

玉茗堂尺牘下



臨川湯若士先生玉茗堂尺牘卷之四

沈何山先生點正

男 開遠錄



門人朱廷誨校

答劉君東

何物能累尊足耶。聞身之亦起立須人。如兄差
爲矍矍。宜及時爲快。塵世事。不足問也。偶寄一
絕。遠遊名字入樓清。四壁江山看雨晴。賴是年

來。雙。脚。穩。俗。人。行。處。不。曾。行。

寄甘義麓

兄。臥。托。有。年。甘。露。門。中。何。得。不。一。爲。衆。生。普。施。
藥。樹。也。弟。年。侵。半。百。寤。歌。爲。適。登。高。西。望。遂。成。
小。韻。不。老。峰。中。半。百。年。時。將。歌。咲。出。雲。煙。家。居。
不。借。金。莖。露。自。有。聰。明。第。一。泉。

答繆仲淳

兄。手。書。良。厚。弟。有。二。親。俱。七。十。餘。無。出。理。留。一。
官。止。是。繾。人。物。耳。知。遊。中。似。兄。無。一。俗。滯。態。者。
更。能。幾。人。江。東。道。風。何。如。幸。時。以。聞。

寄鄒爾瞻

吾。兄。大。筆。有。中。外。時。貴。所。必。不。能。請。者。而。歸。仁。
一。記。乃。爲。兒。開。遠。應。之。如。響。豈。真。以。孺。子。爲。可。
教。耶。合。發。孔。孟。歸。仁。之。旨。真。是。確。論。至。云。性。慈。

生忽學道人正多坐此

與傅商盤司成

門下以天下之士爲海內之宗。河汾地以作之。師築巖天以考其相。冠冕之屬。章掖之徒。仰其門闕。如望雲中之山。挹其津涯。似味忻然之水。何期豚犬得近夔龍。其兄已矣。猶羈結草之懷。有子淒其常恐析薪之墜。普開叢象之雲。重沾

聖阜之雨。撫西河而廻載泣。咏南山而祝萬年。

答李洙山

誦道教。知山陰道中。應接不暇。而更反哭築場。終弟子之義。好禮不倦。瞿相之賓也。前無瑕來。自言能折門下西河之疑。弟心咲無瑕高資。又誰當折之者。大事甚細。非歿數度不能生。非生數度亦不能歿也。此中其苦節度。誰能證之。欲

殺衆何意。千秋某在斯。門下一過敬亭。訂此大事何如。

寄余瑤圃

尊公老師已哀然。易名之請。蕞爾羗社。何關遲疾。貴治孝廉。陸君夢龍。成其材。不下東海長卿。知門下當爲下榻。徐天池後必零落。門下絃歌。請暇。倘一問之。林下人間心及此。不盡。

答江仲文

非仁兄一疏。千秋不知四明事。相國座右銘。非止去國餘忠已也。弟自分袂。杏爾龍沙。公來雪山重。公去雪山輕。匪虛語也。江東雲樹欲寄無由。適徐生能數學。願一窺天於門下。因得附訊焉。庚陽必自有語。

與朱以功

天下非水則旱。而儒之貧者尤苦。儒之真者猶苦。則門下是也。北門賢者。固不諱窮。獨如世道何。

與馮文所太叅

戊戌之計。明公大爲僕不平。言於使者。枳其談。而明公乃復不免辛丑之計。僕三年杳然巖壑。不當入計中。時本寧李公大爲不平。言於吏部。

堂梃其筆。而李公亦復不免。夫以明公與李公。名如日月之熒。實若鼎鈞之重。而誹俊疑傑。尚爲詬讟不置。况如不佞名微實輕。無足光重於世者哉。吳江非遙。而出門之難。阻我夢思。知明公近著寶善編。記吳中耆舊逸事。而太倉起潛師父子。幽善良多。惟前後裁入。書得明公而信。庶可不朽。

與錢抑之

會試取雋者。日近卑弱。亦各自寫其致。學士不知所之。柳子所謂莫莫者。其有宰於人乎。駕二龍於天達。翔獨鶴於人間。是所顛佇。

與姚承菴

門下蒼然藹然。有正叔之正而伯子之和自在。若弟於蘇長公意韻。猶在疑似間也。東坡謂伊

川不知何年打破他這敬字。蓋東坡高資又多。遊於禪。逞逞有拍版門搥之戲。不知敬體無破。可打破之敬非敬也。正叔歌後不哭。此是可破之敬。故蘇子打之。如門下之敬。似無可破者。何如。

與陳匡左

吏含香之秩且中。遂留爲清卿乎。若出當作人

師。江湖之氣方急。惟深心鎮之。與兒輩東望。輒思丈與姜山不置。近得曹能始示遊西山匡阜詩。如出武陵。談谷中事。步虛雲際。便風微聞。可與晤歌。幸爲謝言。

與丘毛伯

正文體自是正論。第我國家全任法。不全任人。卽文體不正者。服官不敢不如法。治偶以此三年一度耳。

寄羅柱宇中丞

宣城湯嘉賓弟宗英也。在世爲一時文章之師。在弟爲千秋道義之友。韓生異才。自可暗中摸索。至以絕不相及之事。累熊芝岡。夫學使者行法。一奸生何負於世。而紛紜若是。世多以酒解醒。弟意非清泉解之不可。兄天下之清泉也。南

北之強。不如不倚。惟留意。

答陸學博

文字諛。死佞生。須昏夜爲之。方命柰何。

寄膠州趙玄冲

宋陳同甫自云。擴開萬古之心胸。推倒一世之豪傑。其入雄厲磊砢。歷落如此。竟不爲世容。惟一辛節制知之。不能終也。以翁丈緯武經文。何

在古英雄下。而竟以一尉小縣令。長謝里門。高歌縱酒。忘憂用老。悲夫。世人目無瞳子。至今極矣。然聞兄諸郎君。並以奇雋發越。人之所損。天之所益。未可量也。門人旌德。劉大甫窮彌甚。氣彌高。欲度淮而東。終業大兄之門。如更不就。遂有望三神山。褰裳濡足之想。弟殊壯之。知大度恢然。能爲之主。雨花臺下。一夢至今。臨風悵仲。

與張文石

弟士學讀文石之文。宦學讀文石之疏。松心竹筠可追大雅。雲聲堂大作。乃屬言非材。伏膺則慙。方命爲慚。竭蹶以成。伏惟裁幸。爰立旣新。來譽斯始。文章禮樂。舍門下其誰。再節以趨。九斗未堪終對也。

答呂姜山

寄吳中曲論良是。唱曲當知。作曲不盡當知也。此語大可軒渠。凡文以意趣神色爲主。四者到時。或有麗詞俊音可用。爾時能一一顧九宮四聲否。如必按字摸聲。卽有窒滯迸拽之苦。恐不能成句矣。弟雖羈住。一歲不再謁有司。異地同心。惟與兒輩時作磻溪之想。

與陸景鄴

僕少讀西山正宗。因好爲古文詩。未知其法。弱冠始讀文選。輒以六朝情寄聲色爲好。亦無從受其法也。規模步趨。久而思路若有通焉。年已三十四矣。前以數不第。展轉頓挫。氣力已減。乃求爲南署郎。得稍讀二氏之書。從方外遊。因取六大家文更讀之。宋文則漢文也。氣骨代降。而精氣滿勁。行其法而通其機一也。則益好。而

規模步趨之。思路益若有通焉。亦已五十矣。學道無成。而學爲文。學文無成。而學詩賦。學詩賦無成。而學小詞。學小詞無成。且轉而學道。猶未能忘情於所習也。思顧彥昇托契之咏。子美同遊之思。謂四方之大。必有曠然此路。精其法而深其機者。庶幾及老而得窺其制作。發鄙質所未逮。則亦足以滿志而無恨矣。旣自俛循。孟子

論友鄉國之士。裁得以鄉國士相友。或未敢與論天下之士。論詩書行事也。僕卽有所通其鄉而已耳。偶一憤憤。欲出於其鄉。承下風於四方之殊才。而疵賤已久。羸蹶日增。行路之難。今世爲甚。安得四出而望見其人。其人又安肯坐而爲某來者。日者忽拜良書。大雅之辱。爛焉千言。大抵引重彌至。猝而受之。面泚發赤。已復驚喜。

自疑。豈天下士亦可以一鄉之士友耶。遊未能出其鄉。而天下士乃肯爲我先而至。古誠有之。何以得此於今也。把玩數四。乃始知陸君蓋有意乎古人。非今人之爲文而已者。詩不云乎。樂彼有檀。其下維穀。他山之石。可以攻玉。夫檀之可樂。得穀其下。以叢翠焉。穀之願也。玉在受攻。得他山而錯焉。亦玉之所不辭也。僕其穀與石。

乎。樂能於僕。而治不能於門下。何也。書所諭爲文之善與病。蓋已精其法。而深其機者。談文字之病。非於有餘。而於不足。地有所不足。在其東南。天有所不足。在其西北。天地有然而況人乎。病而陰。不足於陽。病而陽。不足於陰。亦其勢然也。古文賦。秦西漢而下。率以不足病。無有餘者。詩。唐四傑。子美。可外。亦無有餘。從其不足而足。

焉斯已。幾矣。宗元之論爲文。子瞻之說稼。裁以求其足而止。至於文之質。生而已。成。虎豹之皮。虹霞之色。不借質於大羊。羸。疇必矣。陸君體能文之質。了然於後人之所不足。必曠然於前人之所有餘。其爲美。檀之可樂。而攻玉之有成也。已。論。倘得時。窺制作。以發衰羸之思。幸矣。他日更有請也。

寄袁小修

都下雪堂夜語。相看七八人。而三公並以名世之資。不能半百。古來英桀。不欲委化遺情。而爭長生久視者。亦各其悲苦所至。然何可得也。弟不能世情愴惻事。而於此際無服之喪。無聲之哭。時時有之。更在世情之外。小修當此摧裂。何如。天根來。如兄意氣橫絕。無損常時。而中郎有

子而才。稍用爲慰。湘沔間。正圖一把晤也。

寄南弦浦關中

戊戌僕堅求去官。而明公垂念不置。僕卽從闕下西歸。未嘗一日之任。而竟以辛丑計去。明公力援。翻爲削迹之本。然所留所去之賢佞。乃留人。去人者之賢佞也。明公會目僕爲有關係人。數何得言去。夫世已忘懷。惟感知無盡。一十七

年纔吐此音。南北紛如。曷盡西方之思。

與熊芝岡

讀大疏。始知鉅人在邊不在庭也。玉光劍氣時有白虹。上見於天。行召公矣。郴州有奇士曰陳元石。願一趨風門下與談。必有當也。天下士須有氣力者。承之幸強食自愛。

答石楚陽中丞

弟流覽時事。常有概於卜式之談。縣官有隱能者。宜輸力。富者宜輸財。明公以文武兼資。秉鉞乘障。爲國力臣。弟爲世捐。便宜率妻子耕種牧畜。逐商賈什一之利。致富贏灌。輸助邊。今並以精力罷。緩心計。迂錯無能。有所墾蓄。向麾下少致升粟寸鎚。助軍市牛酒萬一。而猥以破俸。厚貽頽拓無用之人。此其人曾不能與牧豎同短。

長而輒敢醜顏再饗。不幾怙愛而頑無節度之甚者乎。誦扇頭報章。五六十明珠。瑟瑟然從肺肝鏘激而出。必非餘人所得懷袖者。古歌但得一心人。何用錢刀爲。原貺返璧。篤誼中心藏之矣。

答高景逸

門下爲大道主盟。雖千里之駕。已及途窮。而秉

灼之光。猶晞日莫。翕其德音。良深感幸。承問一日千古。其事何在。無欲主靜。談學所宗。千古乾坤銷之者。欲有能一日仁壽在斯第。槩觀斯人有欲於世者。未必能動。無欲於世者。未必能靜。就中消息。詎可詳言。至於世局紛呶。正坐人生有欲。世棄已久。世寄爲誰。或笑或歌。總未敢爲翰音之報耳。

答岳石帆

狂狷辨。極中當今假道學之病。狂者嚶嚶。古人
狂者言行不掩。假道學亦然。至於行似廉潔。則
侵狷久矣。獨狷者踽涼。假道學亦踽踽涼涼。孟
子時尚未進此石帆。今語大是申商仲季辨贊。
深爲公穀流通。炤世爲天眼通。然假道學終不
可絕。彼假中亦有光景滋味也。

答諸景陽

直心是道場。道人成道。全是一片心耳。每問江
東豪傑。天下皆曰有諸先生。最勝處不在講學。
且聞學人多弱。諸先生腰腹殊巨。健啖爲世寄
一喜。歸子慕遂不我遘。兄必有文以張之。

寄董思白

卓達二老。乃至難中解去。開之長卿。石浦子聲。

轉眼而盡。董先生閱此。能不傷心。莽莽楚風。難當雲間隻眼。披裂唐突。亦何與於董先生哉。形家饒生上謁。十年通此一字。生愿而爽。要離冢傍。亦可用也。

答阮堅之

達觀於章門舟中。道我法中。猛持異日。有堅之弟。懷不忘。窾六歸。脩述風雅。流溢已。乃有言世。

外之心。固非世內人。盡了得。扇頭詩。敬亭雲氣。霏疊堂席。率爾成韻。以通名字。不足塵懷袖也。

答鄒公履

任公托末契而爲客。子美思述作以同遊。裁理酬情。今昔無睽。寧當僕不求公履。而公履不求僕耶。當時序已佳。平心定氣。返見天性。可爲良言。僕直望公履。轉縱轉深。才情更稱。少年人不

在平心定氣而在讀書能縱能深乃見天則爾
答凌初成

不佞生非吳越通智意短陋加以舉業之耗道
學之牽不得一意橫絕流暢於文賦律呂之事
獨以單慧涉獵妄意誦計操作層積有窺如暗
中索路闖入堂序忽然雷光得自轉折始知上
自葛天下至胡元皆是歌曲曲者句字轉聲而

已葛天短而胡元長時勢使然總之偶方奇圓
節數隨異四六之言二字而節五言三七言四
歌詩者自然而然而至唱曲三言四言一字一
節故爲緩音以舒上下長句使然而自然也獨
想休文聲病浮切發乎曠聰伯琦四聲無入通
乎朔響安詩填詞率履無越不佞少而習之衰
而未融乃辱足下流賞重以大製五種緩隱濃

淡。大合家門。至於才情。爛熳陸離。嘆時道古。可
咲可悲。定時名手。不佞牡丹亭記。大受呂王繩
改竄。云便吳歌。不佞啞然咲曰。昔有人嫵摩詰
之冬。景芭蕉。割蕉加梅。冬則冬矣。然非王摩詰
冬。景也。其中駘蕩。滌夷。轉在筆墨之外耳。若夫
北地之於文。猶新都之於曲。餘子何道哉。

與湯霍林

李九我清方自愛甚。而非所言者亦言之。當自
少禪理耶。王荆國久禪理。遭遇信主。莫克自終
其用。神物固不可爲耶。將魯越之鷄才。與自爾
非薰學所能爲也。王弘陽陶石簣能轉世否。巖
壑問廊廟事。足爲一咲。然有微意。惟有以教之。

答王宇泰

丈醫書。說受病因緣。對治本末。甚皙。且引不得

爲良相爲良醫語。夫族醫者。徒工殺人之技。無生人之心。以口舌爲烏喙。以白簡爲砒霜。而曰以醫國其可乎。弟曾讀東垣書序傳。其人孤耿。慈惻隱微必敬。蓋有至性躬行者。序傳文字亦精整有法度。世儒恒言漢唐宋如元亦何能十一也。仁丈序文字殆類是非性體行誼深斂樸至不能爲是言。弟數動江東之興。顧堂上有二

佛。日以班瀾供養。且資旅乏。不宜上岸求人。若彼前後者。何知而介介耶。弟之右武。兄之辰玉。俱爲故人。數十年弟兄情禮。知各極悲傷。焦先生不婆婆否。爲弟一致聲。

與李麟初

文章論定。前賢退。簪笏名除。大雅留。可爲名言。媿僕不足以承之也。薄餼未能免俗。所謂式食

庶幾爾。

與門人李孺德

尊公百福。方留難老。以待吾子一第。而吾子更何待乎。不患子才少。患才而存見多耳。令叔楚歸否。見本寧公。當大有所得。幸以起予。

與劉晉卿

吾侄孝友足法。時時念之。愿遠存貽。極感世誼。

大作細讀之。自是異日利器。憶昔尊公在都。生曾携長兒所刻時義。請其塗教。尊公數日後見還曰。令郎文字。大勢不必塗抹。拂其銳志。但令看朱註。讀時墨。自然改觀。至今追思尊公愛吾兒。不以姑息。今吾侄半千里外。以文字求正。若更漫爾圈點。重負尊公於九原矣。但願如尊公教。棄去游習。取朱註時墨玩之。定有入手。總之

此道雖小未易言也。

又

發故篋索尊公手教。長短近三十餘紙。時爲傷心。至其中論時事人物。每多至言。可定是非之極。以發國史所未備。不可不傳。且經不佞裁定。幸次第抄入刻內。并尊公手筆見還。我兩人光景如在目前。不知後人能似此否。

與門人孫子京

江東孫郎久踞石頭城。秋風厲時必須一大決。令郎當已諸生冠軍。父子搴旗畢登快事也。望之。

答黃右文

弟學殖淺蹇。然語人未嘗不盡其誠。况於右文公子乎。急無以相益。喜其有以自養也。風雨遠

歸何能無念。

與丁長孺

兄更以言歸耶。輕垂晚之榮華。保方剛之亮節。難進易退。可謂君子矣。頃復有士人來云。霍林終是道人。求仲亦自奇士。審爾則莊生所謂兩行固可存而勿論也。

與吳曙谷宗伯

枚卜伊邇。正賴明公休休。斷斷鎮重廓清。求大忠於大孝。苦次固巖築之墟也。

答王太蒙中丞

清風所至。吏民灑然。伯東兄語弟云。兄入嶺歲。省冗費幾萬餘。公私餽遺亦如之。炎海爲廉泉。瘴嶺爲冰柱矣。

與門人王起莘

以王氏水蘂之嗣。遊沈氏芝蘭之室。原委旣闕。倡復新。日月就將。噐弘以利。予日望之矣。相圃得公之文。立禮興詩。非止不佞一人之感已也。

谷鄒賓川

弟一生踈脫。然幼得於明德師。壯得於可上人。時一在念。未能守篤。以環其中。來去幾何。尚悠

悠如是。時自悲怛。屢拜良規。媿勉無量。僭評長公文字。知有當否。

與劉冲倩

古稱臭味二字。最微而妙。其中通極噐界之外。不佞宵腹中時時有玉筍冲倩矣。何近遠之間。大作謬爲點定并送。

與晏懷泉給諫

年來計典倚重台垣。一路一家達人自有衡量。正直忠厚至性然也。長公孟謙文筆大進非止爲門下發芝蘭之香。且爲不佞借桃李之色矣。吳生椽有俊才。禮宜先謁長者。惟進而提命之。南治中袁公滄孺雅有道心。不爲睚眦逢迎之態。曲折而至此。門下亦時相引重否。

與吳本如岳伯

昔人云。良牧所在民富。去而見思。初謂平平爾。涉令去官。始味其言。惟清惟惠。可以富民能富其民。乃以見思則門下之謂矣。

答張夢澤

門下毓采南維。宣機比極。出蘭陵而結綬。揚秋馥於清風。臨渝水以鳴琴。寫春融於白雪。士民久芾乎甘棠。賓從隣輝於玉燭。至如不佞偏州

浪士。盛世遺民。可爲大夫。枉登高而作賦。又聞
君子。曾過庭而學詩。子雲之心。尚玄世。皆譏其
寂寞。萇弘之血。未碧天。不鑒其精誠。自分地。阻
人偏。殘叢二酉之蠹簡。何悟天發吾覆。快觀三
辰之龍旗。茫然足音。燦其物色。大臣之度。休休
若自其口。吉人之詞。藹藹如見其心。旣愛我耳。
敢自愧其雕飾。言采其苦。必無棄于葑菲。謹以

玉茗編。紫釵記。操縵以前。餘若牡丹魂。南柯夢。
繕寫而上。問黃梁。其未熟。寫盧生於正眠。蓋唯
貧病交連。故亦嘯歌難續。空垂愛日。感瓶冰以
測寒。願借長風。獻指節而知短。未展登龍一念。
乃煩良馬三之恭承。大製久絃。誦於諸衿。奉揚
仁風。輒謳歌於片楮。名香挹荀令之氣。廉金頒
陶徑之資。感公度之隆施。慙寸私其匪報。

與車加興

吾丈冲明在躬。高華映世。發江楚之英靈。寫衡
廬之秀色。憶南都陪遊。醉德依仁。睠言如昨。茲
復借重中吳。地大人殷。撫以上善。綏用中典。其
在於茲。漢故事以薨國治行第一。召爲列卿。豈
非故人榮望耶。吉父送附致候私。薇垣在望。無
任歧佇。

又

平湖馬映台師老而子少。沈几軒師去而子孤。
上煩宮墻之引。下乞門戶之庇。此不佞所百叩
而祈也。敝門生許應培。以詩禮之門。端而有致。
吳顯科。以簪纓之緒。秀以能文。統祈垂慈。時加
藻拂。極知人微地遠。正以盛德通懷。三千里而
呼。或一應耳。若乃公子龍鳳之標。必取風雲之

友則如錢士升之清。孫弘祖之俊。朱茂正之雅。皆扶風絳帳之英也。嘉雖多士。知者數人。聊作中涓以待伯樂之相爾。

與孫令弘

孫君竒人也。乃知爲公孫貴門。無所苦而自以意性。好爲蒼淵簡遠不入世之文。所謂怪怪竒竒。祇以自娛者耶。已而知君名爲公孫子。高臺

中實有所苦。故激而爲文章。慙悻而苑伊。雖然。然年少亦何至是也。昨讀後寶晉齋記。寥戾綿延。出人語度之外。至云。春秋三十有一。周旋百湍。出罕素交。入徧室適。公孫何其多恨也。晉王述三十年。不爲其從子所知。山簡三十年。不爲巨源所知。以君之才氣凝郁如是。交遊內外。豈遂無足知子者耶。淡以明之。寬以居之。何知公

孫之不復爲公也。

答朱公子茂正

不佞南都奉陪尊公。清英大雅。日夜無倦。後稍踈闊。冰玉之姿。時映人心眼。年來自傷。常闕於交遊。吊恤之事。而公子裁書遠報。不以不躬爲罪。推引穠至。琳瑯滿目。森然有聲。轉悲爲慶。慶我虞葑。兄之有達人也。文字亦有無可柰何者。時也。年餘寸陰。終宜努力。

上馬暎台先生

庚午之秋。所錄者弟子某一人而已。而弟子復以性氣乖時。遊宦不達。無以報稱。南都一問起。居量移平昌。馳問公子。而貴里人云。俱在廉府。寸枕未將。弟子何爲。知師盛德。考槃福履。彌泰而師母夫人。北堂春永。佳公子。翩聯聳秀。弟子

之願殊慰。因便薄致芹私。函丈之前。趨風何日。弟子無任想戀。徬徨之至。

答于中父

極感仁兄垂言卷卷。弟堂上人。已踰八望九老。可當去斑斕。何人跪拜著公服也。拔蚊睫。菜子作。真耶。世局何常。根性已定。惟門下謹者。能斬鵬羽。身以待。

與彭興祖

美人過山中。無可爲報。以兄意度所至。必無人道之患。獨陰陽之患。無可如何。幸甚自愛。

答黃金宇文學

大江以西。乃有黃先生。載籍極博。發天苞地絡之文才。思殊腴。倒珠海瑤山之筆。奏牘可以三千。而無緣索長安之米。對策幾乎六十。而不獲。

奉賢良之詔。人無足與之語。天有所不可謀。良
怖其才深。悲其遇不佞。蚤策步於先醒。晚垂精
於後歿。踰六望七。委筆墨以頽唐。越陌度阡。嘆
知遊之契濶。忽承駢語。喜溢新知。何今茲而始
來。及佳人之遲暮。恐愛之而莫助。感捐佩以何
言。聞將棄小儒之文業。已領大乘之教。割塵情
於綺語。發妙想於靈心。然則此中所爲麗。莫不
霞。正彼岸所爲空花陽燄。敢因愧謝。竟此愿言。
所謂伊人。安得褰裳以逞。逝肯適我。猶堪秉燭
而遊。

答朱廣原

癸未仕人。最早零落。子弟象賢者。亦不數家。而
門下以天授之姿。拓天屬之緒。爲年籍光重。可
以激厲頑鈍。喜倍恒情。顧念門下鼎盛華貴。不

佞沉錮衰委。未敢遽以世好通也。而良書已寔
然巖壑矣。佳扇以揚清風。奇香以襲餘馥。明鏡
以晞未照。美人之貽。感誦無極。至若瑤華之言。
精博婉麗。不佞蹇慙。無能仰酬。率意鳴謝。惟大
雅炤原。

答涂允升

尊公勲震疆陲。行孚朝佇。而門下復冲然大雅。

趨庭之儀。尺寸不失。令人意徃。向愿綢繆。眷焉
良夜。更貽翰音。孝友之性。溫恭之懷。悠然詞表。
第徐生來。直生寒噉。而故山已定。新丘難尋。朽
骨之期。當以異日。

答陸景鄴

不佞得以子墨之役。仰贊幽光。榮重無已。何當
門下。遠書鄭重。似非蕪蹇所敢承也。知此時入

都榮選門下之才。自爲世需。第世實需才。亦實
憎才。愿時虛中以鎮之人。愛不如自愛也。

與張凝一

董范事起。王弘陽先生正在括蒼。言及門下良
工心苦。爲世道受此凌遽。時亦未計後來至此
極也。雖然門下危而蒼民安。社而祝之。自有在
也。郎君雙秀。明月珊瑚。光價南海。易所云鼎折
足。傾否。造物恢詭。前後寧可知耶。遠贈織絺服
之無數。門下未便再粵。時友愍山。攝歸淨理。則
萬物可齊也。

答王慕蓼憲伯

每從還素兄。論貴器英舊。則必先我門下。體粹
行備。仁洽義豐。里居極孝。友雍肅之誠。宅官高
委蛇。正直之節。瞻言明德。展側時勤。借袞西來。

未能利見。而猥承翰音。過爲采信。夫以寸善靡儲。而盱衡首被。一介未上。而褒挹前施。此自休容之本懷。而寔衰稿之殊遇也。東向鳴謝。耿耿曷盡。

與門人劉琪叔

與琪叔語。如行山陰道上。令人應接不暇。別論已心志之不能愛人。不能成身。禮所謂寬身之仁也。小詩爲別。願言琢重。客思蘭亭歸路賒。一尊清遠道家。離懷竟日逢春盡。獨坐長廊看雨花。

復無明上人

生昏鈍爲體。狂慧爲用。何足窺入正之門。探四禪之室。勉成大序。猥承禪宿契。以心宗欣其目論。房杜蘇楊之褒。媿淡徒深耳。南風有便。無靳

捶提。

附五燈會元序

達磨西來。掃滅文字。五燈出。文字復爲祟矣。大都此方教體。最伊聲聞。而支那傳心。文爲結習。神而明之。存乎其人耳。能道人得法黃梅。初心亦用金剛語證入。文字亦何負於此方哉。慧經其能道人後身耶。誕生時。已感經

聲而來。啟悟復從應無所往而入。及其了徹。乃證入杉山不思議境。夫杉山馬駒下人。始終證悟。與曹溪若合符節。其爲能道人再來無疑。刊五燈會元。嘉會承學。用熟來因耳。莊語。火傳佛心。燈傳燈。燈相度。今之爲燈光者。非昔之爲燈光者也。而其爲燈明一也。向使佛心可傳。則三藏亦足。如不可傳。文字不乃。

爲崇耶。嘗謂迦葉拈花。別開一路。持衣示信。祇因此土文習業深。因緣依文不捨。故其五葉兒孫。惟用一翻字法。門掃除文障。直指心地法門。其於文字。蓋亦無幾矣。而見色聞聲。見聞爲倚。至臨濟捧喝一施。生歿本除。故曰無始劫來。生歿本。癡人喚作本來身。旣已擣穴焚巢。豈非祖家一快。而狂慧一啟。真贗轉。

紛不得已。分其正偏。別其賓主。用寶珠而酬王子。以茅土而賞勲臣。嫡庶之分。旣嚴。真僞之差。始現。則雲門法眼之苦心。而曹洞以來。不失之家法也。若如僞仰父子。默相指授。以忠國師三十六字傳心。其事類漢唐之護秦璽。實乃周孔之守義。畫耳旣使。文字之徒。無處住足。亦令捧喝之流。無從下口。而獅乳醞。

翻始不爲馬駱牛漿溷立法至此辨統益嚴
究其指歸要不過一直指心地法門而已故
曰五燈支子不過用一翻字法門卽有強項
魔王痴心調達跳出五燈之外不殊一鼓之
弄琵琶乃知文學盛則律嚴律嚴利用解故
有契北之街頭少林之酒肆解慧學盛而解
復狂解狂利用肅故有神光之定業神秀之

北宗嗚呼解之何心肅之又何心則釋迦支
吾當場弄醜達磨伎倆魔魅兒孫南北二宗
可會其元直向文字堆中蝕穿故紙深山頂
上坐破蒲團亦與契北示現之一燈明耳經
之言曰宗眼不明非爲究竟後有閱五燈會
元得其眼者乎慧經之報佛恩不虛矣

與門人周仁夫

仁夫每爲我言固始魏孝廉。今果大發矣。仁夫
可爲知人。夫能知人者。其人亦可知也。仁夫無
悲不遇矣。

答徐然明

不佞爲文亦旣衰矣。欲求今少壯能古文詞者。
時以自資不可卒得。則取四方諸生文字翫之。
體不必偶。而風神氣色音旨古今大小一也。然

明文字。靚秀鮮婉。復流羨委長。少壯固如是也。
不佞得受其光好。裨益良多。來教云。年事未臻。
風期已托。然則予之資生而生之資予也。又已
久矣。小序媿不文。亦諒其旣衰耳。

與門人葉時陽

生去平昌十餘年。初無所覲。兒子又鮮一達者。
乃爲生繪像立祠。此是貴鄉篤誼。如生薄德。何

以承之。然生在平昌四年。未嘗拘一婦人。非有學舍城垣公費。未嘗取一贖金。此又可質之父老子弟而無擇言者也。庚桑之社。或以是耳。時陽積學苦志。宜便發去。令子文理近益。豈否。且夕爲平昌祝者。黃槐丹桂間。多得一二人。正不必皆臨川桃李也。

與門人時君可

君可是文場利器。遲速不必論也。平昌祀我。我以何祀平昌也。昔人云。天下太平。必須不要錢。不惜死生。或不媿此文官耶。

寄鄒梅宇

與兄三世之好。在外經年。何能不思。二夢記殊覺恍惚。惟此恍惚。令人悵然。無此一路。則秦皇漢武。爲駐足之地矣。兄以廉吏作客。未便作饒

客也。

與趙南渚計部

初試政時。極承知遇。倉卒南去。自知才非世需。不敢求通長者。後益淪落。每讀大疏。軍國平章。千里之外。宛如聚米。國體民生。於焉是賴。而忽來旁及之論。遂成遠引之思。豈有維繫之誠。徒滯近關之迹。詩云。雖無老成人。尚有典刑。每咏

斯言。恨身已錮。不能出一言。爲明公發其悃。聞明公已待放於郊。夫咫尺君親而去。佳難言。朱紱之困。甚於蒺藜。此幽憂之士。所不能堪。而何以爲名公釋然也。捐擯以來。長安問絕。而獨不能忘舊於明公。以明公立朝。都無過舉。所疑一二大事。自有主者。後人當自諒之。明公無愧色也。惟優游龍蠖。以爲世儀。周志齋堂翁無恙。

其公子名位何似。幸示之。

答張夢澤

丈書來。欲取弟長行文。字以行。弟平生學爲古
人文字。不滿百首。要不足行於世。其大致有五。
弟十七八歲時。喜爲韻語。已熟騷賦。六朝之文。
然亦時爲舉子業。所奪心散而不精。鄉舉後。乃
工韻語。三變而力窮。詩賦外無追琢功。不足行。

一也。我朝文字。宋學士而止。方遜志已弱。李夢
陽而下。至瑯琊氣力強弱。巨細不同。等厲文爾。
弟何人。能爲其真。不真不足行。二也。又其厲者。
名位頗顯。而家通都要區。卿相故家。求文字者。
道便。其文事關國體。得以冠玉欺人。且多藏書。
纂割盈帙。亦借以傳。弟旣名位沮落。復住臨樊。
僻絕之路。間求文字者。多邨翁寒儒。小墓銘時。

義序耳。常自恨不得館閣典制著記。餘皆小文。因自頹廢。不足行三也。不得與於館閣大記。常欲作子書。自見復自循省。必參極天人微窈。世故物情。變化無餘。乃可精炯弘麗。成一家言。貧病早衰。終不能爾。時爲小文。用以自嬉。不足行四也。元以前文字。除名人外。不可多見。頗得天下。穉縣志讀之。其中文字。不讓名人者。遙遙而

是然。皆湮沒。無能爲名。名亦命也。如弟薄命。韻語自謂積精焦志。行未可知。韻語行。無容羨取。不行。則故命也。故時有小文。輒不自惜。多隨手散去。在者固不足行五也。嗟夫。夢澤僕非衰病。尚思立言。茲已矣。微君知而好我。誰令言之。誰爲聽之。極知知愛。無能爲報。喟然長嘆而已。

與門人陳伯達

長公愛我。我愛長公。莫往莫來。每懷子衿之嘆。十月盡。或過章門一晤也。誦來作令人怡然曠然。卷卷未能萬一。

與馬公子長卿

弟兩拜吾師於長安後。在南都致問而已。弟子之敬闕焉。初謂世路稍通。酬知未老。已而世棄無能。復奉音旨。讀世兄行實。泫然淚下。長喟而

興。當吾世爲吾師。而不知其人。可能免於驚鈍之誅乎。勉從諸大筆後。爲神道碑。亦不知弟子能傳其師否也。然因師以傳弟子之幸。弟未歿終當一掃墓下。嘔其寸心耳。

與王止敬侍御

門下以清衷雅抱。擢居耳目之司。世道良幸。弟巖壑已久。無緣作長安書。私懷慙焉。君子群而

不黨抑而強與幸益自韜以須大用。

復耳義麓

弟之愛宜伶學二夢道學也。性無善無惡。情有因情成夢。因夢成戲。戲有極善極惡。總於伶無與伶。因錢學夢耳。弟以爲似道。憐之以付仁兄慧心者。

答陳古池

大道視不可見。聽不可聞。體物不可遺。講者不知是講體。是講物。講物則不盡。講體則不能。弟所以遲領教於門下耳。張侯自是久而相知。公事澹臺。可無避也。

與朱以功

章門無右武爲壯士。無相公爲長者。何處受我輩耶。時時念中。惟有朱先生。三兒每見朱先生。

一度卽著裏一度也。

答錢簡栖

姑蘇大雅士。舊獨莫寒泉。今獨錢簡棲。氣岸橫絕曹伍。有當予心。遊道非委軟。難愷亮難也。得楚遊諸語。霏疊歷落。茲與蒼厓兄相對。斷橋江閣間。如見足下。時屬兄常倅處。能相物色否。

答但直生

書來知令先公佳城改卜。謂景純誤人。不佞妄意水土。比水自是地中物。江南土淺。較爲迫水。西北地厚。至三丈不得水。復少華潤。管公明止望四獸耳。捉龍知脉。時師常談。要亦不得不爾。常見縉紳家。親方水蟻時。權利轉上。歸而後覺之。殆不可曉。總之令先公盛德。足下至性。允終其吉。不佞齒至。近得一不食之土。容速朽焉。未

煩多師也。

謝鄭輅思羈伯爲作相圃生祠畫像記

不佞少學爲文。薄成影響之用。長習爲吏。空以木強爲體。烹小鮮而覺擾。候單鳧而不復。此亦無所短長之效。固宜罔攸進退之利。已而吏民矜其恹恹之忠。人士采其揭揭之義。因存得一之愚。用著在三之厚。去再考而猶拙。托千祀以

彌慙。若不獲鉅公之筆。則洛陽石闕。無緣甄其治行。浚儀畫像。誰與施其神明。久之射堂爲通矢之墟。灌壇等嘻出之社矣。竟邀天幸。獲承公度。引矍相而傳義。援澤社以徵禮。蔽芾無留。何有勿剪。勿拜馨香。莫遺安得。采蘋采蘩。乃愿達人君子之言。置之高陵深谷之地。乍披文而傳質。已玉振而金聲。乃至錦傷見捐。而推以機杼。

刀尺之妙。琴急委絕。而謚以高山流泉之響。跼
啟而咏。唱嘆有餘。讀至行可質天地鬼神。不覺
涕從何以得此。譽以文能安民。人社稷。徒令汗
浹無所承之。

與門人胡元吉

嶺南百姓。極喜吾省人士爲長吏。董擴菴在東
莞。治行至今稱第一。楊臨臯遠矣。萬里之行。始
於足下。願言勗之。莞爾文雅餘風。可鳴琴而治。
清聲時聞。用慰我心。

答黃荊卿

七年之官。二十年之別。千里之外。能憶六十歲
老人。壽之以詩。可謂不忘之至矣。來詩云。傳聞
去國譚猶劇。不道爲郎罷。卽貧似爲悠悠者。解
夫悠悠者何足爲解乎。太守蘇公課賦。見弟家

淮兌米止一十二石。問曰：國租本折相半。公歲穀當不能滿六百石。且公爲宰幾何年。弟對曰：四年矣。蘇公嘆曰：人言何足信。弟咲而謝之。古稱知己之難。世豈有達觀怖死。義人要錢者耶。

復牛春宇中丞

保障重臣。具文武才望。而徒拾無影細事。致使請告難留。旣褻民宗。仍傷朝體。識者謂何如弟才質踈鄙。然留之乙未之計者。南公也。銅以戊戌之計者。溫公也。夫以貴鄉二老。趨舍不同。則南北之情。益無足異矣。誰將西歸。懷之好音。世諦悠悠。臨風嘆息。

臨川湯若士先生玉茗堂尺牘卷之四終

蕭然忽颯風刺息。

南去之聲益無以異矣。請錄西韻對之。故音世
丸之昔昔。盛公也。夫以貴祿仁孝。誠舍不同。願
木。與。想。淵。然。留。之。了。未。之。昔。昔。南。公。也。融。以。出。

臨川湯若士先生玉茗堂尺牘卷之五

張夢澤先生訂定

男 開遠錄次

門人朱廷誨校

與劉天虞

意仁兄便起家郎丞以上。不謂更紆南服。邇得
宦籍。見作荆隄丞。爲兄悵然。然有一耆宿云。荆
州措大多如鯽魚。沙市琵琶多於飯。餽措大多。

可憎琵琶多可近也。仁兄漸北。太宰知我乎。燕燭郢書。弟不爲悞。

答易白樓

門下清操惠德。當異常震蕩之後。收拯還集爲勞。而更以蕪葭之親。遠懷樗櫟之齒。彌邀篤誼。具仰優材。道體冲明。諸惟自愛。

與門人余成輔

足下何似。膏火自煎。淨其膏而火自恬。人生火傳也。惜薪修祜。古有名言。念之。

答許子洽

僻在江外。子墨之遊無幾。幸如門下。貢思假以芳帙。淵雲徐庾。春容駢陞。獨幸無以仰承。贊唱也。不佞幼志頗鉅。後感通材之難。頗事韻語。餘無所如意。挈此於吳中。如以殘礫比海月耳。

與李還素

君家兄弟。每以孝友相先。名位相讓。恒令人歎。願至若以相公在事而臥。托彌高。必有悟超然之致者。達人因任而行。似難固守。誓墓之節。再過章門。披雲覩日。當知笑涕同時也。

東門人陳元石

客從海上來。使我聞所未聞。如泉春甕。不足澆

其磊塊也。口占以似。班荆長笑。楚多才。獨自譚。兵海上來。慙愧一編黃石訣。清時頭白不曾開。

東陳如吉給諫

於疑氣生於激。賢者正不免耳。若夫人有。爲一人者。有何南北也。

與吳繼疎

僊舟遡洄。從之竟不可得。趙仲一書。以煩清篋。

國學孫君懋昭清才雅操湖中不易得者惟門
下高眇之王宇泰兄學深而行樸宜相朝夕彼
護太倉自是師友之情弟最疾夫賣恩爲名者
仁丈以爲何如

答曠聲和

門下含醇毓粹出仁義忠孝之鄉蘊質宣文起
敖城冠蓋之域祖有功而詒翼哲人之儀別相

望子能仕而教忠儒者之風猷自遠三世相傳
四聖易允潛躍之維時百畝之田一卷書正麓
藁而有獲從南臯爲師弟子指仁文首座以爲
期在東吳多士大夫悅禮樂鳴琴而可治頃承
良範示我孝思宛轉百年之中淋漓千里之外
兼以士論有人銘志懸諸日月重以予嘉乃考
綸綍賁其扃泉而復垂意殘叢待以集翠敢曰

哀誅之屬。一時所推。徒以嘆心之言。同里所習。窆碑則設。無乃賤玉而貴硯。末簡可裁。庶亦遺華而采實。

答費學卿

春雪淋漓。擁簾微咲。而良書適來。疊疊千言。推獎過至。憶僕幼從徐子弼先生遊。而愿忘年於惟審。因能研弄。模寫長便。習之弱冠。過敬亭梅。

禹金見賞。謂文賦可通於時。律多累氣。因學爲律。粗以紀遊歷。寄贈言懷。無與北地諸君接逐之意。北地諸君亦何足接逐也。寄示二詞。絲麗可愛。制義典雅。圓和小有異同。知不爲訝也。公子翩翩十舍而遙。無緣一携手如何。

與幼晉宗侯

君行殊慢。知留亦無以永客歡也。高張楊徐詩。

一過已快。都有矩格。縕藉深穩。不漫作大。是以清氣英骨爲主。後輩李粗。何弱餘固不能相如。恨未得見王止仲。饒醉樵詩。醉樵似是臨川通人也。

寄張聖如齋使

觀人者醉之酒以觀其恭。予之財以觀其廉。今所試於門下者。非衆醉衆濁地耶。石門之歎夷。

齊比心門下。當有道處。此積水奮飛。未可量也。庾嶺南枝。時勤夢想。惟益堅冰雪。以候春陽。

與丘毛伯

公舉太夫人高行。上下莫不欣然。愿相揚激。以光朝命。母賡鴻鵠之歌。子叶鳳凰之什。世際盛事。何幸覩之。

答孫子京

以不佞犬馬之年。煩子京鸞鳳之篇。挂我草堂。自得驪珠徹夜明矣。每一披對。如在秣陵春署。時感思非言所旣。因墨妙知卽君復是過庭。大足愉快。荆卿亦寄詩爲壽。幸一致謝。

賀王紹賓憲伯

門下以父母之愷悌。爲天子之保鄣。借法星者三年。允矣。江湖紫氣。播清風於萬里。峩然嶠嶺。

青天臨桂。促熙春。父老攀轅於東邑。甘棠留化。雨衣冠寫詠於西江。何但懷去思於五賢。固且佇來儀於八座。不佞披雲宇下。愛日天中。快覩遷喬。旣來好音於幽谷。欣聞適館。敢致微敬於緇衣。

寄門人朱六義

言者催請館試。當是仲夏爲期。以門下淵抱風。

期自是玉堂中品。臨川二百年餘。不得借一。當
事者有維梓之意否。罷縣尚缺。惟有難之者乎。
前罷縣各一人。司之而不足。今罷縣共一人。攝
之而有餘。因以知吾罷之易耳。

與馬梁園

仁父道兄。里居超然。物際而行。備規繩。非公正
不發憤。殊尉涇陽兄書。大有義味。而細欠商量。
乃致疑然。並作聞天虞兄復爾。吾徒俠骨。何處
不銷耶。年運而往矣。握手竟是何時。

寄林丹山

不佞昔在孝廉。數受明公度外之知。春穀堂中。
宛陵樓上。遊宴盡日以忘疲。笑言申旦而不寐。
姜公慷慨於燕市。明公臥托乎長安。密歷周旋。
意氣殊絕。何意楚材零落。姜公已爲故人。而明

公謝事高居。廓然蒲海。雖丹青之彩。自成羽儀。而東山雅望。豈終林壑。遙來我思。累有年歲。每過天門石碓。想凌陽子明。何可更得。猶記公子亭亭玉表。當卽珪璋廟廊。而尚滯庠序。豈連城相償。固自有待耶。追昔撫今。興言愴戀。

與吳伯霖

常讀王仲師九思至巷有蚰蜒邑多螳螂觀茲

嫉賊心爲切。傷不覺。大噓人雖多。僻何詎。如許弟自舉子來。便遠於州縣。徒以棄斥衰微。親老子稚。未能絕情門戶。兄視弟志意。於世榮落。亦何有耶。貞父於弟不薄。五年之中。無一私語。謂世如夢。南柯黃梁。轉爲明顯耳。

與許伯厚

孟德王大將軍。皆少壯時。卽雄飛得意。尚有伏

櫪之悲。敲壺之感。况於苦心伏首。數十冬春。而未得借一者。悲感更是何如。勉之。今秋吾向鴈行中。一望燕臺捷書也。

答黃二爲

憶齋頭鷓首。把袂譚心。恨無繇一度芝城。載遊蘭室。而更辱惠音。兼以雅爵。思存所逮。何日能忘。書院賦已多蕪累。敢辱頭陀之命乎。思罔清魂。必能幽贊。棲賢之舉。功德何量。

寄曾金蘭

讀仁兄宗通序。道味悅心。似有投於夙好。禪關娛老。或不昧於往因。未嘗不欣言獨笑。氣味同然。顧以世法相牽。戲論爲累。終不能如吾兄拈性相以橫陳。表宗經而直上也。熊生云。數過衡山。不見金簡先生。猶爲虛度南岳。惟進而御之。

并借新知。以發衰憤。

與門人李超無

初弟以僧來見。大似可人。長髮章門。便作殘僧矣。學書學劍。拓落無成。重以交匪之嫌。致有竊鉄之議。必自反也。又誰尤焉。第許中丞公江東妙宰。讞刑惟平。來撫吾西。益留慈恕。令公係其至戚。淑問乃其素風。但可矜疑。必從寬政。此時

惟有痛自讖悔。盡消業緣。萬一可回。自是神君好生之德。若妄擬求援。微彰怨恚。雖有善者。可如之何。悵矣難言。悽其曷盡。

與李孺德

孺德爲尊公岡陵之祝。所謂華蓋只在人心是也。華山百六十里。而不過我。能無悵然。幣卮之况。何德以承。服之無斃。酌以自壽。拜雅誼矣。兒

未嘗不學。尚難一舉。足下終是絕塵而土耳。

與門人劉大甫

主者尚爾遲遲。南闈何如。今吾弟須速取龍頭。爲熱心人一快。貧者士之常措。大亦別無逐貧法也。

答朱朱陵

糧藥經營。日不暇給。硯席之事。戒而不親。每承

下問。愧戢彌深。更辱於令君處。婉言屈禮。此自明公友于至性。追念令兄遊好。第不佞年來自廢。了不關人。魚相噉以沫。不如相忘於江湖。楚水吳山。未旣鳴謝。

答李乃始

良書媿媿。推挹深至。實無俗情。弟妄意漢唐人作者。亦不數首而傳。傳亦空名之寄耳。今日侷

得詩賦三四十首。行爲已足。材氣不能多取。且自傷名第卑遠。絕於史氏之觀。徒蹇淺零碎。爲民間小作。亦何關人世。而必欲其傳。詞家四種。里巷兒童之技。人知其樂。不知其悲。大者不傳。或傳其小者。制舉義雖傳。不可以久。皆無足爲乃始道。吾望足下。或他日代而張我區區者。何足爲難。雖然。乃亦有未易者。宋人刻玉葉爲楮。

三年而成。成無所用。然當其刻畫時。不三年三年。而不專其精。楮亦未可得成也。恃足下知而愛我屑屑言之。惠詩久弊。幸更書以貽。

與孫見玄

碣記疊疊萬言。凡弟塵微。並收無棄。丈夫方以龍矯之姿。驥首雲漢。而乃垂潤於枯蝸泥鮒之流。敢曰風義之相期。故是淵懷之遠惻。圖報何時。

私懷靡罄

與劉君東

來教旁人何知我輩交情也。屠長卿曾以數千言投弟弟以入行報之渠頗爲怪。弟云古人書上云長相思。下云加飡飯足矣。此世人所不解也。公子何得不留膝下耶。古人秉燭夜遊。是真寶語。弟偶隨兒子至此。歸去看演黃梁夢耳。

與門人王得環

開賢書得足下姓字。不啻兒輩得之。賓巖師清躅。其踵之矣。葉時陽知已南歸矣。風便無忘好音。

與姜仲文

仁兄卿月之臨。猶需旦晚。公論爲訝。弟曰。昔人以無書抵政府。爲賢。今人反之。養冲自應久此。

耳

答董嘉生

不佞極不喜爲人作詩古文序。因足下卷卷成之。昔慚長卿。今愧本寧。過學卿可出此一過。當悲歌也。

東門人李太虛

雪中屏去襪。累讀書寒。舍足稱男子矣。不佞得

太虛。固前有光而後有輝。太虛得不佞。猶欲日有就而月有將也。夜間口占以似少年豪氣。幾時成。斷酒辭家。向此行。夜半梅花春雪裏。小窓燈火讀書聲。

與沈華東憲伯

世大治亂常起於殺人。殺人常起於殺萬物。讀老伯樹德堂稿。始知吾兄讞鞠多所全活。有從

來矣。承諭代作。弟從來不能於無情之人。作有情語也。

與常州倅陳翼愚

承教李超無倘今日存戰粟之餘。當異日効投桃之報。江東儒俠具感高誼。寧獨不佞榮藉已哉。

與蘇石水督學

門下初下羊城之幡。欲奉龍門之馭。而終以禁例。未能自前。迨真人遠引。亦復瞻望弗及。寤言爲悵而已。門下卽以紫帽爲葛巾。以金粟爲寶。稽而四海人士所望蘇公者。謂何。昔荀公每踐三事。輒思太丘。二相自不能不興懷於此矣。

與門人陳仲宣

佳作氣食全牛。自堪壓卷。然令師大聲許人解。

元。不。止。洩。漏。天。機。并。亦。唐。突。人。意。宜。罰。不。宜。賞。矣。

答王霽字制府

珠。厓。可。擊。捐。之。徒。以。屈。漢。公。卿。銅。梁。旣。開。長。卿。所。以。喻。蜀。父。老。人。言。不。足。中。每。信。而。見。疑。公。度。有。餘。外。且。存。而。不。論。固。已。允。文。允。武。庶。幾。純。孝。純。忠。至。如。不。佞。清。時。棄。士。僻。壤。餘。生。見。武。公。代。

有。司。徒。願。附。緇。衣。之。好。聞。召。伯。王。命。乃。祖。喜。傳。圭。瓚。之。文。顧。後。進。而。當。王。公。之。前。纂。組。難。通。於。錦。水。匪。先。容。而。居。賓。客。之。末。絲。蘿。乃。寄。於。松。潘。敢。云。續。千。賦。之。心。何。當。動。百。年。之。感。一。語。爲。知。九。頓。鳴。謝。風。雲。路。斷。無。由。沾。公。旦。一。沐。之。榮。雨。露。天。寬。庶。幾。賡。吉。甫。萬。邦。之。頌。

寄陶石簣

門下德心醜粹。道履貞固。躋之玄纁之秩。專以
羨醴之任。必且調玄幹世。賞氣成務。而細人難
與達觀。敦士未卽大受。乃如來教。豈非因心爲
量者。由乎我而自知。緣噐爲功者。存乎世而靡
必哉。至如不佞。故無通俗之識。空有忤物之累。
長縻豐草。誰曰不宜。而又以下貧乏于野之資。
生累少出門之適。爾思非邈。我覲猶勞。徒爾戀
豐容於朔邸。展詒翰於陪京。想似徘徊。眷言閔
嘿。宿德如斯。餘可知矣。二葛侑械。綌兮緜兮。凄
其以風。則寒士之懷也。

答章斗津

不二生不測。所性匪安置。無欲所不欲。有欲天
下庇。來詩可謂照用俱全。末云義孔臨師。保乾
坤爲家舍。則幾乎大矣。五十以逞拜惠。殊深敬

謝

寄馬梁園

賈生宋忠同在季主卜肆。幽思清辨。雖極陰陽之致。亦覺長沙落落。弟得見兄在魏無雙店中。奇俠相聞。目擊而咲。遂爲同進兄弟。走馬江淮間。作清強男子。而弟亦奉祠秣陵。音貌時接。道誼相督。中不顧私。我輩交情。神明所聽。後兄稍

得通挹提文江右。弟時謫歸一見。竟爾寥廓。遂至於今。各爲世棄。此其抑塞流放。長沙之投宋忠之使奚足道哉。貽哲兄來。欲作詩宣寫愁結。而歌酒沉連。遽不能成音成文也。前曾中丞送問弟懷中何人。弟云。止有汝上馬長平。彭魯軒貽哲云。兄體逾旺。而弟逾瘠。箇中去就。貽哲能道之。悠悠忽忽。惟有強食自愛。

與饒三明

數欲一葦從之。輒以不勇自愧。石楚陽昨詩云。漢家有急終難讓。未必箋疏老一經。弟答云。箋疏閉閣。渾閒事。長伴漁樵。到日曛。仁兄以爲何如。

答衛淇竹中丞

昔爲屬吏。今作部氓。筆墨之役。其何敢辭。第臣之壯也。尚不如人。况其衰乎。何能供衙官一視也。

與龍身之

久不聞問。喜貴體猶健。而長公賢能立門戶。醉鄉無恙。春日彌長。白髮丹心。總付杯中物耳。

與陳思岡給諫

門下清苦。古人之所難。世寄之所恃也。大奏抵

疑觸忌。仗清白而制詭隨。釋細微而攄偉鉅。悠
悠者世人之情。耿耿者貞士之志。置之舊京。亦
豐芑仕人之意耶。

與鄧太素

十年仰止。纔一登堂。殊慰鄧林瓊樹之思。寶劍
星懸。借大手一揮。便爲旌陽生色。寒射珠宮。蚊
螭却避矣。

與嘿菴宗侯

愿門下遠念。茗以滌口。刻以清心。如吸冰雪。銷
此永夏。馮公白頭孤苦。長遊以鷄足山。破熱惱
耶。弟入省。止有哭吾師一事。思之亦是世間法。
於道人何與。得吾丈集句。先爲致西州之感。爲
報故人。憔悴盡誰家池上。又逢春。可謂長歌當
哭矣。

寄魏合虛大行

昔賢定交於杵臼。賞契於桑陰。曾無一介之通。撫塵之舊。引之惟恐不亟。稱之惟恐不盡。其志意殊也。門下英風茂。誼學者莫不聞而楚士陳生嘉礎。吳生光龍。於方內外無不通。真足吞吐雲夢。日近長安。惟門下時有以壯之弟語無妄也。

答牛春字中丞

知兄已爲遠志。如近事。何天下忘吾屬。易吾屬忘天下難也。

答門人蕭承之

劔在堪訓諾。囊清不賣文。何能向如許。人作涸鮒也。來書感高誼矣。

答丁右武

亂世思才。治世思德。惟中世無所思。然吾輩不能不爲世思也。高臥北窓。亦何可便得。

與門人朱爾玉

聞爾玉益貧。貧不失爲爾玉也。唐宜之傳遠度。卓左車。是秣陵三珠樹。爾玉時逢來否。尚書兒。訓梓成。幸惠百帙。身不能作尚書。猶欲以一經貽子也。

寄謝耳伯

安石不出。當如蒼生。何以門下清才高韻。一餽能輕萬石耶。午秋一曠。惟專意大業。以慰遠懷。不盡。

與王相如

相如才氣橫絕。欲下帷讀書十年。乃出甚善。不盡。讀天下之書。不能相天下之士。故曰外遊不

如內遊如僕老矣。居無可談。得貞父來。同臥語。三日差絕人意。亦時念及足下。恨遠莫爲致。余生時執批。送藍翰卿奇博士也。煩爲道卷卷。

與馬心陽

時議紛紜。各省大吏持祿養重而去。長吏因以羊虎不可治。上干天和。所在旱潦異常。就中獨是善人窮餓。嘉興馬先生其最餓者也。年來何

以樂此。星家雷生過謁。吾兄與之坐而問焉。亦知弟同此餓也。

與岳石帆

孫賀明清材。當爲世資。而漫遊臨川。昔人云。未有夢乘車入鼠穴者。此不其然耶。承示笑贊。時爲絕倒。顧世局無一處非可笑。茲且日新。弟且續遠公之會。二三石友其許我乎。

與吳葵臺

以克壯之猷。利大作之用。快甚。貴治文學。晏有聲。能以諫議自通。孝廉王道新。能以文章自見。獨風聞真州李季宣之子。秀才爲商人所苦。瓜州蕭成芝之子。童生爲里人所侵。皆弟故人。二十年不相聞問。心殊念之。吾兄暇時。以垂清問。卽當我秋風一度也。

答劉貽哲

德音從天而下。始知諾葛公度瀘。傳示婦子僮客。莫不驚喜。詢知兄黑頭無恙。勉身就官。封疆廊廟。無非可效者。文字三種附上。劔州聶君世潤。真恪士也。丞撫州卽以真恪不諧去。幸引重而薦進之。承問。敝邑令君葉明生。清惠宜民。林凌九殊俊。當亦難入蜀乎。

復門人王天撰

手書疊疊。知足下嗜我殊癖。此是往因。非關今作。別後苦濕昏墊。似瘧似寒。五旬乃起。無復神明舊觀。伏枕讀文字。一過霍然。爲作一叙。蹇短不自知其云何也。扇頭詩。宛有深情。貪和志感。足下當知我心悲耳。

答李孟白岳伯

江以西。地薄人劇。加以春夏則霖潦滔天。秋冬則焚炙掃地。米價騰翔。盜言踵至。戊巳之隱。猶未底。此時非明公先後天而慮。詳左右民而法。備力贊兩臺。疏蠲議賑。民其魚乎。民靡子乎。倘不佞今日。猶得飲天食地。秋毫皆歸鴻造。手額祝謝。非值不佞一人已也。賀闈伯書已領。看定文字。容異日附報。

復徐鍾汝

吉父兄來云。吾兄之清。更湛於水。至今蔬食爲
民祈福如此。安得長物貽我陳人。適弟迎得丈
六。大像安奉廬嶽棲賢。正乏舟資。卽以回施。更
爲遶禮三匝。奉祝吾兄宰官身功德無量也。

復于振方岳伯

得于池亭。徼惠于旌。煖此寒色。伊人有懷。寄之

薄詠。恨無佳筆。仰佐仁風。異父今之古人也。瞻
佇何極。

與易楚衡

海內知遊。在貴翹者。英沉踔厲。意氣皆足千秋。
亦各乘時。極其幹用。惟胡浹老。扼塞津途。齋志
以沒心。甚念之不謂遺孤。搆閔乃至於是。幸有
門下仁人。長者。生歿而肉骨之。金石高誼也。扇

頭四雅以王孟之音寫陶韋之思六月披襟甫
覺清風徐來不知於陵漢陰於肉食何如也如
弟短才何當江沱漢汜之餘而謬忝袞詞哉逕
資貳拾聊爲浣老公子讀書之費黃襟老未行
弟尚面有所托也

與蔡槐亭

吾丈文章經濟所至鼎呂郎位清華隱然公望

曲江拜署以來烹鯉不嗣近見除書知復出牧
嘉水此羆吳越之交江海所會樞機鎖龕舍丈
而誰鄧生過我云石帆兄讀易之餘雅意吟染
閒氣胸中一點無令人愴然

答門人吳芳臺船使

昔人稱身處脂膏不能自潤若未處脂膏何言
清也吾弟此其時矣海剛峯在南盡裁官吏費

共至貳千餘。不佞見而知之。魏見泉在邊。歲節互市費積至七萬餘。以爲修堡之資。不佞聞而知之。二公卒稱名臣。吾弟市雖小。不妨以大人自爲也。宦東粵者。清濁皆易見。吾弟勉之。

寄郭振龍

門下起忠孝之鄉。詣文章之域。僚東華而東陽借色。切寶婺而北極儲禎。固已頌蜚百里。揆佇

二台矣。許中丞之名德。盧儀郎之危節。在門下殊禮中。否舊南太常簿。吳直齋。令子存恭存肅。從不佞最久。家世舉業。何似倘收之。參苓之末亦門下桑梓至意也。

答陳偶愚

弟孝廉兩都時。交知惟貴。罷諸公最早。無論仁兄衡湘昆季。卽思雲愛客。亦自難得三十載英

奇物化殆盡。炙鷄絮酒遠莫能致。良朋永嘆風人知之矣。弟不記仁兄何由負謫家食。天與佳兒得鸞鷲而輕腐鼠。復何恨。康侯高義涉江來。命適苦拮据。都無靜思。其去其存。物貴自遠可耳。

與孫見玄學博

竊祿平昌。櫟械菁莪。一無所有。然旣嘗得其士

而子之。惟愿賢人君子明師傅時。加保持如金玉。宣言庶亦忘其前度之教。令凌隨也。如門下色咲伊教。心口俱融。固群弟子之謳謠實鄙裏之舞蹈也。至若十年擯棄。無足去思。而必寵之以文。飾之以句。此自淑人君子教民不遺厚念耳。

荅吳岷陽

時維正午。禮直佳辰。偶將豚犬之兒。觀於流水。特思鸞鳳之友。蓄彼高山。眷何日以遊。蘭欲因風而採艾。乃愿冲華。及於衰朽。肉黍閔靈。均之既餒。梧仁感威。鳳之同食。雨茶開金縷之香。雪酒映青蒲之色。自美人之爲美。與清者而皆清。諸附足以珍完。再肅手而鳴謝。

答孫公哲

玄宮梵館一再周旋。少年早抱長生之訣。衰年乃就無生之意。未遂商量。別去良悵。拙詩無似。書來猶稱不惡。當是用謔爲愧耶。

答馬心易

三惠良書。闕然不報。此時男子多化爲婦人。側行俛立。好語巧笑。乃得立於時。不然則如海母目蝦。隨人浮沉。都無眉目。方稱盛德。想自古如

斯非今獨撫膺矣。偶記兄欲我長歌撥悶扇頭。
奉爲撫掌之資。眼中人如陸太宰。何可更見右。
武居會城終不甚適。一丘一壑乃可著吾輩耳。

寄董思白

門下竟爾高蹈耶。尊鱸適口采吳江。於季鷹花。
鳥關心寫輞川於摩詰。進退維谷屈伸有時倘。
門下重興四岳之雲在不佞。庶借三江之水芳。
訊時通惟益深隆養。以重蒼生。

答汪雲陽太叅

弟受性疎梗。戶外都無長者車來。而丈儼然臨。
之信宿之間。三顧白屋。日月過而幽草回風雷。
至而慵魚動矣。兩受良書。優渥滿紙。承諭權事。
已定有仁人長者。覆露在上。縱不盡鷹化爲鳩。
或可日損以月。耶弟書生何足仰。贊萬一當道。

吉而淦。賀君夫人蠡斯。樛木之祥也。

東謝耳伯

高雅如門下。去小遇以成大遇。未非天之相吾子也。鄙吟志別深。尊明燭意何窮。漸喜南行背朔風。吳粵去來將萬里。人情多在絕交中。

東徐觀我

吾丈既翔江浦之龍。復下雲間之鶴。分身普化。

有脚行春。緬邈伊人。安得尊羨千里。奉陪調鼎之餘也。何東白樸茂長者。惟丈有以振之。

答王起莘

浙水之湄。忽飛翰而下臨川之壑。語語俠骨。何王郎之壯也。惟望門下發憤。專精舉子業。冲漢而起。爲舊師光也。遨遊名家。貴能進取。以資藏習。餘語心銘之矣。千秋之人。顧與一時之人爭。

伎倆乎

答馮觀察

蘇子云刻木而拜之。一旦以爲薪。必有所不忍。弟前日不忍二字是也。安心是寶。方命爲慙。

寄薛欽字

惡心道旨。旣已隱耀湖東。復爾廻翔蜀道。雖眉山錦水。足勝麻源赤松。而仕隱留連。終非銓人。

者愛名賢之義也。顧塵心世目。妄爲欣滯。禪深定久。寧復置懷。獨以借節西來。舊民所渴耳。兒輩毛羽未成。報知何日。夢想周旋。徒深悵戀。

與劉宗魯

金張累葉良佳。不必盡爾。但能捉麈清言。便是王謝家子弟。况如門下風骨。文旨居然舊家。可勝欣慰。童門闕欵。別思爲勞。更愿遠遺。拜嘉爲

愧。快閣秋高尚圖晤既。

與李孺德

尊公允稱人師。忽忽左遷。直道不可行。亦其時也。天逸我以老。人子之心。能無快乎。舞班之暇。加以絃誦。自是人間至樂。殘梅落盡。春杏當開。萬惟努力。

答樊致虛

每行日月之灘。動覺風雲之氣。而門下乃翹然發秀其中。臨汝三舍地。風期之末。流射無已。常恐不伎資淺分薄。猝無以迫近休景。傳會以傳而麗人。適以通濟弘筆見受。繩勉銘誦。刻鏤龍鱗之堦。鎮奠鼉跌之石。美哉樊川。詞雖窘蠢。因明德而遠矣。不謂木瓜之投。實獲瓊瑤。僥榮陽之重。飾平昌之醜。以射序爲瞽宗。采繫爲畏壘。

千秋之感實在於茲。讀近作。噫。噫。泠泠。益復。曠
異人地。映發。固自天縱。秋深。病骨稍疎。當從太
末星。瀨布帆。而東。峩峩洋洋。知絃歌非遠也。

答沈何山

儒相盛於江東。以吳興爲冠冕。而門下家世道
場。代興湖學。每羨太史公。與門下文心。藹藹質
行彬彬。二華吐秀於金莖。兩室含靈於玉樹。五

湖之陰。三山之陽。海內同仰。而忽於燕來之日。
驚傳鳳字之書。譙光滿。浹於行間。引重逾深。於
望表。捧之而愕。慨焉以嘆。顧惟不佞。無能吏事。
有負明時。分絕意於風雲。敢晞光於日月。迨其
謂矣。焉用文之。倘江右徼大越之靈。借具瞻於
露冕。卽不佞終小山之隱。尚致咏於宜衣。

答鄭孩如

尊經數語。琰琬千秋。不佞何幸。徼齒於仁人長者。計最當。遂聽尚書履聲。中州士民更得一遲飛鳥否。

與汪雲陽

弟爲雷州徐聞尉。制府司道諸公。計爲一室以居弟。則貴生書院是也。其地人輕生。不知禮義。弟故以貴生名之。允陽兄爲記。已立石。昨新志

不錄其文。弟思允陽兄有道氣。其文非偶然者。仁兄宜一補刻之。亦嘉惠後學意也。

答王觀生

才如觀生。而長貧賤者乎。家人睽世情。應如是耳。有黃金臺在也。願言勉之。

與孫子京

得禮經數作。便是玉帶圖也。小序得以燕石裝

寶劔之晉。乃愿珍遺。自是高誼。不鄙易故。師耳。
余髮種種。筆亦如之。序語短而意頗長耳。

寄林丹山

世實需才而未必能需才。才與世所以長左而
嘆世憐才者。相望於今昔也。如門下材度橫絕
一世而竟爲嚙選所沉。家食閑閑者且二十年。
大闡固仕國而莫相推輓者。何兩相並里。楊公
之後。千載奇遺。以人事君取才。自近舍丹山。其
誰也。南望興莆。曷盡眷眷。

與朱朱陵

子得先生。蓋英英大雅君子也。委玉摧鋒。不我
長觀。別後胡山人一醉奉常東署。山人無恙耶。
悅道書來。述門下高義。殊絕一時。扇頭二詩。見
存亡之感。入長安。晤中郎兄。當爲舉天亦潏然。

灰之句。胡湜侗在時的。樂可喜。聞其子辱甚。幸左右之知。易楚衡多賢子。殊樂并爲致意。

寄蔡虛臺憲伯

憶從門下斟秣陵之酒。酌杜陵之詩。莫遊於心。每成於目。嗣後風流雨散。不我時。違門下望隆。三事妄意之。當得衡文。江右或下章門之榻。庶合延津之劍。終不可得。借節延吳。江海素心於

焉。遙托終貧且。海越陌爲難。莫逢莫來。勞思永嘆。門下冲明在躬。世寄日遠。惟洪暢嘉德。以應機璇。江陰諸生李至清。問禪匡廬。經行已久。有志請纓。無慮按劍。自非虛臺。孰當憐而收之。敢爲緩頰。

答孫見玄平昌學博

門下吳世公侯。越都君子。秉理樹於民宗。命世

包乎物祖。鴻漸天逵。擬臚傳太極之殿。龍蟠地
澤。仍光映少薇之墟。固將老其梗楠杞梓之才。
工師得木。且以深其風雨露雷之教。山川出雲。
遲斗魁者三年。積風濤乎萬里。然猶上善彌卑。
休光自遠。時噓不燄之灰。猶惜旣傷之錦。孰嗣
子產。遊鄉校以忘言。汝爲召南。示門徒而勿拜。
英詞潤金石。牌板銘心。高義薄雲天。門墻載德。

與吳縮生

尊公臯比。何似爲人師。不勝爲人長。耶當便從
六館轉清曹去。正自不惡。昨索柱聯。勉就惟裁。
存爵里自東吳。幾千年延陵不乏季子。江湖直
南斗。垂百尺高居。可摘星辰。

答卞玄樞

不佞病下滯。秋稍劇。得扇頭大作細諷之。大雅

之音便作西來爽氣清人矣。擬一和音而巡使去急當續致也。承以時蒞下詢不佞以爲時文。惟時是因卽以貴羈人士文字。至馮公而思微。至陳公而體鉅。至譚君而氣馴。至趙君而意結。不以維梓爲恠。但取利器爲資。則此四元者皆門下緩急之絃。淺深之墨也。時義入彀何必高談。卽如曹平子機到筆隨。自不可及。恃愛漫爾作答。知不爲謔也。

與吳亦勉

吳地文物浩穰。吾鄉吏其土者。或慧或愿。逞逞有以自見。理學勝也。况夫至慧而處愿。其所自見。固益有異者。門下意性冲明。物莫能迂。而縉藉經畧。復深以弘。上下咸宜。有譽無吝。遠問極爲。舞躍徐檢。老起家公處。廉樸自將。時鄉士屬

吏有難之者。竟以治行尊顯。至今撫吳門下。其勉之。他日亦公之坐也。致聲思白。雖甚愛弟。如世吏何。吳多異書。稗說。未經世目者。能求其二。解頤否。

與岳石梁

別去復是涉夏。滔滔草木。長衰人不可復強。時念仁兄才度英遠。必膺世寄。良爲欣然。顧亭之昨過云。兄似介然於東林。惟於乃翁猶存。炤亮仁兄可謂知人。允過處。的是涇陽本色。餘或未盡然耳。適粵著作當已就帙。亟欲讀之。用豁衰疲。

寄薛欽宇觀察

門下以道旨應世。不可得而親疎。罔攸疑於進退。而乃來嘖言於大雅。何傷井渫不食。徒爲行

路人惻耳。汲收有時。義學無盡。小詩奉貽。少致
斐其之韻。

與陸津陽岳伯

明公舍寓內之冲明。發雲間之鉅麗。長安一觀。
清氣溢於素襟。豫章載言。舊德形乎色笑。吹暄
寒谷。許談辨於高筵。采翠枯條。引陶匏於刻石。
移歲序而感嘆。滋深想風神而夢想。何極喜因

當湖之逞。敬申臨汝之懷。道重機衡。北望徒懸。
於斗極天。開節制南行。或拜於章門。仰津漢之
昭回。明河正午。祝陽德之方至。永日乘乾。

復瞿睿夫

兄弟四十年來。忽然白頭相見。感愴欣慰。何能
自勝。中間兄以孝廉流弟。以郎官謫沙漠。炎瘴
各極天涯。所讓避者。兄才氣英闊。加有舊貲。足

爲著書。食客之費。而弟故儒素宦淺。無足與遊。小詞自遣而已。然而儉易容。少病。視兄苦折處。羗爲饒減。天道也。雖絕聞問。時一念之。從黃來者。定悉起居。昨見兄神明炯然而形氣頓異。凡有心者。誰不爲惻。况如弟者。同明相照。情切自倍。瑣旅下舍。大浸窮炎。溢水甌山。如墊如炙。僮客被病。轉側須人。何以堪此。或者章門龍沙高。人避債臺也。來書殊苦不忍讀。到汗下病已。并爲豁然。遂成六絕。引意諸惟減思益食黃髮爲期。嗣相見也。

寄徐聞陳慎所

知盛德醇完仁壽滋至。令公子孝謹有聞。令孫當已振振秩秩。不佞覩想舊遊。時動天池萬里之興。知我者希。惟太丘德星。亭在耳。貴生書院。

已入省志。劉公應秋記文尚遺。似宜增入。今嘗
卓深一丈乎。榕樹依依。風期未闕。惟門下加養
難老。引翊主持。幸甚。

復俞淳初侍御

邸報排議紛如。惟大疏折貴戚之邪心。固宗社
之本計。方是有關係文字。舍親易瑞之一趨一
步。自是孔門卓爾。宦學相成。惟終惠教之

復胡瑞芝司空爲二女納采作

門下氣合天粹。不應王明起丹筆以籌七兵。樞
垣望久。坐紫薇而階一品。井絡功高。疇若予工。
營洛借貳都之重選。於衆舉稽臯將九德之諧。
信在國則公輔。惟公卽承家亦相。門有相弟。俯
惟暗劣。仰憶光儀。舟楫同遊。國士委金蘭之契。
庭堦異彩。都人談玉樹之竒諒。非偶而其地旣

同故匪煤而自天作合。屈體勢六卿之重許。媿
盟二姓之驩。百里千飛。甫占鳳鏘而遠耀。九霄
而上。卽看鵬翼以高翔。旣松蘿業已成言。欣承
允吉在槐棘。猶云脩禮彌覺。讓尊寧。須後命爲
榮。已拜先施之辱。

賀吳曙谷相公

閣下儲祥太乙。毓采函參。紫氣出盤龍。卽禪僊

而位宰相。丹誠儀瑞鳳。從禮樂而踐端揆。行晉
接於專槐。作孚先於維梓。荆國欲堯舜其主。五
百年名世。重生康濟。以伊傅爲臣。六七作行人。
再至千齡。僅遣萬國同瞻。况在枌隣。彌深栢悅。
趨風拜舞。足蹇頓而未能。向日颺言。意豐茸而
欲吐。君子道長。無負開天建子之辰。元老望高。
正值中岳生申之候。匪吾私而致慶。庶天下之

得人。時值相公誕日。

寄馮文所

追憶作史明公屬下。如井羸餅。更加提挈。雖終
焉不免引繩絕。振思莫可忘。章門有懷未。既爲
悵。雲林遙敬附。積私陶潛寄。聲武陵漁父。知有
賢主人在也。

與阮寄卿

熟門下高誼。三年於此。仲連季布之。與恨不
佞。踰跟藜荻中。不能一握手。爲悵。扇頭小韻。庶
幾情見乎詞。

答門人黃元常

施糜散木是賢喬。梓高誼。但饑流感目。拯卹關
心。文字定損佳思。惜年來衰憤。無能爲少俊。鼓
舞耳。釵香付內并謝。

必文字矣。其卦思卦。平來。寒。對。無。論。為。少。對。楚。
蘇。梨。錯。木。是。質。喬。執。高。詰。耳。雞。流。渴。日。淋。血。關。
答門人黃示常

與卦具平結

卦。與。題。蔡。蔡。中。不。誰。一。卦。手。為。卦。與。小。端。或。
蘇。門。不。高。詰。三。平。於。出。卦。數。季。平。之。與。與。對。不。

臨川湯若士先生玉芟尺牘卷之六

何天玉先生訂定

男 開遠錄次

門人朱廷誨校

答吳徹如太叅

門下冲年對日。壯節傾時。毓南國而麟趾自振。
久稱君子之子。起東林而臯比獨擁。將曰聖人。
其人。既玉色以揚休。亦黃中而通理。至如不佞。

放三年而免逝未能消積罪於公。卿偶一旦而
嚶鳴猶幸竊奉教於君子爲俗所擯乃時爲道
所容同病相憐詎謂同明相照我思公子延陵
湘澧之間公眷幽人靈谷柴桑之際

又

不佞於世何所短長而恹恹發憤乃與明公一
塵而論乎筌宰珍明公於席上斷鄙人於溝中
有用無用乃適其分更辱來咏引重過當卽加
爵二列詎足爲榮恨伏枕未能劇吟以報也引
領曷盡

與李稠原

相地猶如相人形神欲親貴絕人多精於相地
而蔽鄉人多精於相人王生遍遊名公卿常自
謂得見俊人能令自品俊見痴人正自轉痴耳

此語殊快。物華天寶間。知有稠翁矣。願引而聽之。

答張稚原

每念吾師鍾鼎之緒。惟兄一人。千里江湖。殊勤鄙念。遊觀一度。智意日新。中有所得。無緣便與人語也。

答羅匡湖

兄譽弟文章冠世。或是道德不如人耶。近一絕寄華山道者。奉博一咲。遙歲彭城。欲降麻僊官。八百走龍沙。今秋又拜延陵相。天下紛紛來謁華。倘門下有此興時。弟當掃望僊橋以待。

謝徐匡嶽

書院大記精實廣大。歸仁知止。旁皇會通。何論之著也。兒子開遠。遂得此於門下。太陽乃爲寸

燧延暉。洪鍾乃爲尺筵。流響耶。未知終無負大
教否。庶鍾鼎之文。引而勿替耳。

答馬仲良

不佞少頗能爲偶語。長習聲病之學。因學爲詩。
稍進而詞賦。想慕古人之爲。久之亦有似者。揔
之有韻之文。可循習而似。至於長行文。字深極
名理。博盡事勢。要非淺薄敢望。時一強爲之。輒

棄去。誠自知不類昔人之爲也。明公過聽。毛伯
之言。盱衡揚眉。謬爲引飾。委以頌言。勉承嘉命。
祇益慙泚。誠又自知其不類今人之爲也。瑤刻
大致。性乎天機。情乎物際。星月定於衡璇。風雲
通其律呂。含星吐激。自然而調。英妙如斯。過此
安極。讀而樂之。又不啻身爲昔人矣。

答彭芹生侍御

十數稔來。獨得兩公。疏明目憊志。門下言其內。熊公言其外。言其外者。乃在干城。言其內者。乃在腹心。至聖學。䟽暨法祖錄。所謂黼辰崇之。則有勲華之盛。常帶守之。則有王公之重金。金石日星。莫有鉅焉者。如不佞章句附之。小儒詩賦比之。童子跡其去官。咎坐迂妄。固非以疾邪忤物。跣地見遺。至如門下去就。乃可爲衡權之重輕。

丘淵之夷實爾。良書先被。引詡獎借。尊光莫踰。自惟鈍朽。何以來茲。憶昔某公。始未出山。與終而還山。議論風采。恢然鉅公也。當其執政。殆極憤憤。名鉅已爾。餘復可知。卽非有傍子之言。亦不能受正人之用。若曰惟當語以平平。豈一平人所能也。門下意度高廣。而家食甚貧。如未能盡去。浩冗終當委蛇。一出乎世。棄君平。君平未

可棄世也。

答門人鄭龍如

春風時來。忽得龍如扇頭贈詩。寰中皆辟易。未足仰承。世外有同心。差爲厚幸。南屏大作時。照几閣間。錢受之何得云爾。不小吾江右耶。

與孫子嗇

瑯琅大編。本淹中之名理。發郢上之奇音。心骨

俱清。神采並茂。極慕用於衰蹇。輒寶示於群頑。嗣晤劉大甫。始知旌節已在鍾陵。禮重維桑。情深班草。而公歸已亟。予跂未能悵寄如何。昨得讀尊公大集。益知至性有源。越人輿誦。皆知執法之清。而楚水瀕危。具見遺身之孝。事兼家國。義叶君親。此風人所以發興於景行。而沈心於懿德者也。聊因南羽。少附思存。小刻并附政庶。

幾無愛風斤。垂光秉燭。

答門人鄧君遷

聞君遷篤明無上之理。不廢有中之事。義學既極。精入文字。復爾蒼沉。第時課穿襍。謬種流傳。縱浚發於慧心。或取驚於拙目。恃愛遠詢。點定以復。

答李乃始

僕年來及致仕。而世棄已久。平生志意。當遂湮滅無餘。獨丈每見有暱僕之色。每聞有賞僕之音。僕萬有一中。不無私念。秋栢之實。枯落爲陳。偶有異人。過而餽之曰。此不歿之餌也。則必有採而畜之。以傳其人者。而自度清羸。恐一旦爲秋栢之實。不能不倚丈爲異人也。獨自循省。爲文無可不朽者。漢魏六朝李唐數名家。能不朽。

者亦或詩賦而已。僕於詩賦中。所謂萬有一當。爲丈不朽者。過而異之。文章不得秉朝家經制。彝常之盛道。旨亦爲三氏原委所盡。復何所厝言而言不朽。僕極知俗情之文必朽。而時官時人輒干之不置。有無可如何者。偶而爲之。實未嘗數受朽人之請。爲朽文也。然思之亦無復能不朽者。比來人才未有聽睹。才識如丈。年纔不

惑。庶其圖之。僕觀館閣之文。大是以文懿德第。稍有規局。不能盡其才。久而才亦盡矣。然令作者能如國初。宋龍門極其時。經制彝常之盛。後此者亦莫能如其文也。習而鬯之道。宏以遠誠。知且朽。猶欲逾於莫之。示而無所聞者。

答門人桂仲雅

我所思兮在桂林。乃三年不通一問。而有遐心。

耶。眞實作舉子業。是所爲知已。祝耳。李公書幣附壁。不知其人可乎。僕今日耐鬻文。當日亦耐鬻爵也。

答王宇泰

來教令僕稍委蛇。縣或可助三逕之資。且不致得嗔。宇泰意良厚。第僕年來衰憤。歲時上謁。每不能如人。且近蒞吾土者。多新貴人。氣方盛。

意未必有所挹。而欲以三十餘年進士。六十餘歲老人。時與末流後進。魚貫鴈序於縣之前。卻步而行。伺色而聲。誠自覺其不類。因以自遠。至若應付文字。原非僕所長。必糜肉調飴。作繻衲中扁食。令市人盡鼓腹去。又竊自醜。因益以自遠。其以遠得嗔。僕固耳之矣。所幸鷄肋尊拳。長人者。或爲我一映耳。然因是益貧。田可耕。子

可教。利用安身。僕亦有以觀。願也。趙真寧書。亦語及此。種種情事。悅之。兄能爲兄詳言之。總非諸筆能盡。

與宜伶羅章二

章二等安否。近來生理何如。牡丹亭記。要依我原本。其呂家改的。切不可從。雖是增減一二字。以便俗唱。却與我原做的意趣大不同了。逞人

家搬演。俱宜守分。莫因人家愛我的戲。便過求他酒食錢物。如今世事總難認真。而况戲乎。若認真。并酒食錢物。也不可久。我平生只爲認真。所以做官。做家。都。不。起。耳。廟。記。可。覓。好。手。鐫。之。附宜黃縣戲神清源師廟記

人生而有情。思歡怒愁。感於幽微。流乎嘯歌。形諸動搖。或一逞而盡。或積日而不能自休。

蓋自鳳凰鳥獸。以至巴渝夷鬼。無不能舞能歌。以靈機自相轉活。而况吾人。竒哉清源師。演古先神聖。八能千唱之節。而爲此道。初止爨弄參鵲。後稍爲末泥。三姑旦等。裸劇傳奇。長者折至半百。短者折才四耳。生天生地。生鬼生神。極人物之萬途。攢古今之千變。一勾欄之上。幾色目之中。無不紆徐煥眩。頓挫徘徊。

徊恍然如見千秋之人。發夢中之事。使天下下之人。無故而喜。無故而悲。或語或嘿。或鼓或疲。或端冕而聽。或側弁而哈。或闕觀而咲。或市湧而排。乃至貴倨弛傲。貧嗇爭施。瞽者欲玩聾者欲聽。啞者欲嘆跛者欲起。無情者可使有情。無聲者可使有聲。寂可使誼誼。可使寂饑可使飽。醉可使醒。行可以留。卧可以使。

興鄙者欲艷。頑者欲靈。可以合君臣之節。可
以浹父子之恩。可以增長幼之睦。可以動夫
婦之歡。可以發賓友之儀。可以釋怨毒之結。
可以已愁憤之疾。可以渾庸鄙之好。然則斯
道也。孝子以事其親。敬長而娛。成人以此
奉其尊。享帝而事鬼。老者以此終。少者以此
長。外戶可以不閉。嗜欲可以少營。人有此聲。

家有此道。疫癘不作。天下和平。豈非以人情
之大。實爲名教之至樂也哉。予聞清源西川
灌口神也。爲人美好。以遊戲而得道。流此教
於人間。訖無祠者。子弟開呵時。一醪之唱。囉
哩噠而已。予每爲恨。諸生誦法孔子所在有
祠。佛老氏弟子各有其祠。清源師號爲得道
弟子。盈天下不減二氏。而無祠者。豈非非樂

之徒。以其道爲戲。相詬病耶。此道有南北。南則崑山之次。爲海鹽。吳浙音也。其體局靜好。以拍爲之節。江以西。弋陽。其節以鼓。其調。誼至嘉靖而弋陽之調絕。變爲樂平。爲徽。青陽。我宜黃譚大司馬綸。聞而惡之。自喜得治兵於浙。以浙人歸教其鄉子弟。能爲海鹽聲。大司馬歿二十餘年矣。食其技者。殆千餘人。聚

而論於予曰。吾屬以此養老長幼。長世而清源祖師無祠不可。予問。倘以大司馬從祀乎。曰。不敢。止以田竇二將軍配食也。予額之。而進諸弟子。語之曰。汝知所以爲清源祖師之道乎。一。汝神端而虛。擇良師。妙侶。博解。其詞。而通領其意。動則觀天地人鬼世器之變。靜則思之。絕父母骨肉之累。忘寢與食。少者守。

精。魂。以。修。容。長。者。食。恬。淡。以。修。聲。爲。旦。者。常。
自。作。女。想。爲。男。者。常。欲。如。其。人。其。奏。之。也。抗。
之。入。青。雲。抑。之。如。絕。絲。圓。好。如。珠。環。不。竭。如。
清。泉。微。妙。之。極。乃。至。有。聞。而。無。聲。目。擊。而。道。
存。使。舞。蹈。者。不。知。情。之。所。自。來。賞。嘆。者。不。知。
神。之。所。自。止。若。觀。幻。人。者。之。欲。殺。偃。師。而。奏。
咸。池。者。之。無。怠。也。若。然。者。乃。可。爲。清。源。祖。師。
爲。序。之。以。記。

寄虞德園

之弟子進於道矣。諸生且其勉之。無令大司
馬長嘆於夜臺。曰柰何我死而此道絕也。廼
爲序之以記。

寄虞德園

護仁兄所爲天主之徒文字序甚深微妙。東方
人護佛西方人護佛。耶林楚石送揚叟來云。
工容成之術。過湖頭當謂兄長生之術。與無生

之旨何如。

與但直生

良書疊疊。知一意時。文字殊慙。嬌兒兒女。偶爾
流態。不待飾粧。青衣有遇也。殆如夢中。婉孌耳。
老女施禱。必須粧嚴。精曉尊章。鑒之。姒媼睨之。
俱可而後。君子安焉。此如醒時迎別。故難易若。
變耳。總之。男女遇合。有命也。直生正當醒時。未
能免俗。聊復爲之。爲之則得矣。

與張大復

文字或一題數首。歷落磊砢。筆意所至。昔人如
在。李超無來。知門下抱丘明子野之疾。而聽詠
徹明戶。屨滿書。何竒也。貴里豪桀。惟諸景陽。清
士惟歸子慕。子慕不可作矣。止敬又云。有一孝
子之孤。得門下存之。甚善。幸無更作時義。冥思

老易太玄著書可也。

東劉大甫

大甫海上之觀殊快。有古烈士風矣。小詩少壯行色。玄冲書并送。欲別悲歌鷄。又鳴白頭無計與劉生。恩讐未盡心難死。獨向田橫島上行。

答沈湛源

捧讀方城諸議。公真可作州也。如云艱難非豪

桀不濟危困。非權變不解。此是世間法。如云樹老歸根。人老還鄉。此近出世間法。至於世出世。卽無老少權實耳。直心是道場。正不必作涉世觀也。吾兄在彼。上下必相信重。無所疑難。持以道心。亦不爲旁縣少年所妬。寇履走集。賢聲易翔。諸惟堅貞。以觀名世。

東鄒梅宇

昨越客譚黃白之術。兄便欲舉債從之。弟因思
鍾祥一大汞爐也。兄已錯過。此會不宜更錯。廉
吏可爲而不可悔。遂成口號。博笑。余裁足食。衰
疲早。君幸衰遲足食。難獨羨。賊官歸老。健一生。
羸得不求丹。梅宇令鍾祥未幾以忤稅璫落籍

復汪雲陽

承諭已如教。以對弟觀。邇來言不忠。信行不篤。

敬州里蠻貊都不可行。而可行於銓省之上。名
稱兩盛者。有之。然或不可久行。耶。故遂昌令辜
志會。六年水蕪。至不能遣女。東鄉令曾遇。去縣
時。士民環泣者千餘人。清惠之聲。科甲中所不
能多見者。乃僅得知萬州。與丞廉州而已。銓贖
贖若此。欲吏無賄。得乎。俱係貴屬。惟仁兄有以
異之。非弟私也。

答鄒爾瞻

門下書云當令冲父大有見聞又云不宜令聽新聲大見聞全在新聲不令聽新聲恐終吳下阿蒙耳弟近已絕意詞賦道者萬物之奧吾保之而已而益食貧時或間作小文所謂白雲自怡悅耳門戶過大時官難對無如之何也

寄李季宣

弟於兄交雖道義情逾骨肉廢棄十餘年始得一通問可謂有人心乎想仁嫂以次百福玉郎諸生幾人真州石城是吾屬嘯歌之路也魂夢在茲能無慨愴弟棄官速窶日甚一日幸二尊人健飯三兒粗能讀書不至憂能傷人耳千里風期曷勝契闊之嘆

與李莪明

門下奏最六年。和風之惠。秋月之清。自當銓管
九流。封彈六省。而仍脩旋郎宿中。論謂何已。復
思維近局。如沸遷止無期。進退難遂。更喜明公
脫穎而出。拔塵而飛。且容與於都官。轉清通於
吏部。木升而成雲棟。鴻漸而荷天衢。回視同時
而項領折腰。妄意而徘徊戲路者。異日遲速相
校。何止三四載已哉。則門下之未爲不遇也。知

台旌過敝。毳而北。道左當罄此懷積也。

答羅敬叔

讀十二故人傳。知高誼久矣。弟少學詩賦。祇以
自娛。不似前人用此挾交作聲色也。所至得罪
名人。非止敬叔。前於右武兄處邂逅。僅高揖而
別。欲一語不得。忽然懷舊心傷。克生仲焱皆爲
異物。吾鄉此道亦復鮮人。如敬叔者。何可便得。

大將軍何以重揖客也。

東杜西華

倚床憤憤聽兒誦孝經。因附會其旨。識之簡端。或是弟絕筆耶。

附春秋輯畧序

孔子曰。吾志在春秋。行在孝經。吾師明德先生。時提仁孝之緒。可以動天。融融熙熙。令人

蓄焉有以自興。春秋末之有詳也。桓文之事。仲尼之門無道者。春秋時有褒貶。非所雅言。杜君與予同師。其於春秋也。有師授耶。春秋一孝經也。孝經自天子諸侯卿大夫庶人皆爲分明其孝。曰資孝以事君而敬同。春秋多嚴君之義。周公以父配天。孔子以王係天。所謂其敬同。諸侯卿大夫有事君不忠者。非孝。

也。五刑之屬三千。無大於不孝者。春秋其刑書與。蓋至孟子以幾希別人於禽獸。曰庶民去之。君子存之。歷叙君子存之者。至君子之澤。五世而斬。五世者。有虞氏三王孔子也。孔子存幾希之性。全在春秋。故又曰。春秋盡性之書也。君子存之。天下有孝子忠臣。庶民去之。天下有亂臣賊子。亂賊興而小人之澤亦

廟之鍾球。而高闈之柱鎮也。天幸計吏得望光儀。儼朗冲凝。流光可挹。立談數語。動感垂慈。向後投棄。音徽遂遠。幸時咏封奏。知朝有人焉。野亦可恃。茲者明公更以甘棠聯大越之陰華。萼並長春之色。豈獨題材於春署。恒將對拜於黃扉。聽鸞和之在天。忻燕喜以無地上。路新秋。干旄在望。曷任依依。

大將軍何以重揖客也。

東杜西華

倚床憤憤聽兒誦孝經。因附會其旨。識之簡端。或是弟絕筆耶。

附春秋輯畧序

孔子曰。吾志在春秋。行在孝經。吾師明德先生。時提仁孝之緒。可以動天。融融熙熙。令人

蓄焉有以自興。春秋末之有詳也。桓文之事。仲尼之門無道者。春秋時有褒貶。非所雅言。杜君與予同師。其於春秋也。有師授耶。春秋一孝經也。孝經自天子諸侯卿大夫庶人皆爲分明其孝。曰資孝以事君而敬同。春秋多嚴君之義。周公以父配天。孔子以王係天。所謂其敬同。諸侯卿大夫有事君不忠者。非孝。

也。五刑之屬三千。無大於不孝者。春秋其刑書與。蓋至孟子以幾希別人於禽獸。曰庶民去之。君子存之。歷叙君子存之者。至君子之澤。五世而斬。五世者。有虞氏三王孔子也。孔子存幾希之性。全在春秋。故又曰。春秋盡性之書也。君子存之。天下有孝子忠臣庶民去之。天下有亂臣賊子。亂賊興而小人之澤亦

斬矣。得春秋爲之懼。而澤存得孟子辯無父無君者。爲禽獸。而春秋之義益存。忠孝同春。秋一孝經也。安見明德先生言孝經非卽言春秋與。乾則雲行。坤則履霜。氣一而已。杜君春秋分隸五倫。終以天應。近於志氣交動之說。其於先師仁孝動天之旨。不遠。吾有取焉。

答門人曾在中

僕不效君平賣卜也。久矣在中善爲我辭焉。

與無去上人

秋淨尚圖借一臂。袈裟地聽龍門說法也。四香戒如教上。不亂財。手香。不淫色。體香。不誑訟。口香。不嫉害。心香。常奉四香戒。於世得安樂。

與翁泰輿

往來東越得習令。兄先生風政。淑人君子蓋清

廟之鍾球。而高闈之柱鎮也。天幸計吏得望光儀。儼朗冲凝。流光可挹。立談數語。動感垂慈。向後投棄。音徽遂遠。幸時咏封奏。知朝有人焉。野亦可恃。茲者明公更以甘棠聯大越之陰華。萼並長春之色。豈獨題材於春署。恒將對拜於黃扉。聽鸞和之在天。忻燕喜以無地上。路新秋千旄在望。曷任依依。

與盧貞常大叅

聞之禮入其境。而五經之教可知也。攬秀樓文字千餘。不佞錄近六百。泐泐乎。鬱鬱乎。層積森發。此皆門下愷弟作人。致大觀如斯。顧諸士貧。合貲僅梓其半。盛美不全。殊可慨惜。成大美者。必謀於大人門下。當爲欣然了此。知無難也。

與方玉城

玉城思緒英奇。不謂千里殊風。得成良晤。清歌綠酒。長夜畱連。悵彼離情。正如昨日芙蓉未。攀展何其幸。帝子閣中得。邁左使君。知道履逾暢。小姬別館能自超然。良慰大筆必多瓌瑋。非此不能爲公脫穎也。

答趙我白大史

被病久時。念天水真人。奮欲從之。無路也。幸以

河梁之節願一追陪。而風雨淒人寒瘠所避。捧
讀大章金石爲響。搔首一過頭。風頓拂開春能
勝杖履。當從研墨於雙姑鳳凰之側也。

答羅匡湖

市中攢眉忽得雅翰讀之。謂弟著作過耽綺語。
但欲弟息念聽於聲元。倘有所遇如秋波一轉。
者夫秋波一轉。息念便可遇耶。可得而遇。恐終
是五百年前業。寃耳如何。二夢已完。綺語都盡。
敬謝真愛不盡。

寄左滄嶼

目中如門下。零露蔓草未足擬。其清揚秋水霜
兼差以慰其游。遡鳴琴山水太沖深。招隱之情
遲暮佳人惠休擬。碧雲之詠。倏焉別去。渺矣伊
人再覲無從。悵佇何及。

答王相如

巖壑已久。聞其無人。足音空谷。乃有相如。陶陶
永夕。淹雅雄發。方媿適館。荒涼無以。假司馬而
尺素。遠貽重之。白紵風義。藹如委蛇。素絲長卿
故自多情。加以凌雲之筆。隨在當爲重客。何煩
不佞。饒舌也。養田近業。何如秀才。念佛如秦皇
海上求仙。是英雄末後。偶與耳。

答黃貞父

破曉循池。梅花早放。凍雀喧然。不謂有美人之
貽。世喪道久。微道力誰當。憂之憂身不治。正是
世外人事。久當不復憂此身也。

答李還素

蒲柳之姿。偃臥江閣。扈惠曹溪。三作檀度。機神
言無不盡。至云非不讀六籍。一讀一脗。脗文字

原不立。何字可寓瞬。可謂爰頌窮於此域。喟贊
深乎彼岸矣。豈非朱溟浩杳。雲霞之所沃蕩。浮
峯軫隱。日月之所回薄。驅靈洞秀。合而成東父
之文言。耀南瞻之震旦耶。珍藏鳴玉。代響洪鍾。
病起觀濤。晤言斯企。

寄彭魯軒侍御

不佞有識以來。見直指使者。何止數十公。遑遑

幹潔自將。要以補偏蹈隙。非欲直爲世界傾洗。
一番否濁。更不畱餘。如兄之治越。與弘陽兩公。
雖被患而去。吳越間庶幾一清身爲男子高步。
中原。他更何論。不佞割鷄而傷。况其大者。新舊
之間。久成局段。豈可爲哉。

答沈華東

不根之譚。出弟門人之口。誠然。因新知而賣故。

知借舊師以贄新師已遍南部洲矣。豈吾鄉爲甚。弟宦淺來者常不能厭其意。但今人厭其意亦不能厭其口也。卽如陳思罔日市斗米而謂其侵腴田鄒爾瞻絕口公事而謂其好與人事。他可知矣。

答門人陳仲容

大作竒特。却是尋常道理。日月湖中恒有異產。

欣快何極。

寄李孺德

聞孺德成進士殊快。以孺德恂恂孝友。他日當不負此科名也。吾輩初入仕路。眼宜大。骨宜勁。心宜平。勿乘一時意興。便輕落足。後費洗浚也。顧僕一生拙宦而教人宦乎。然亦以拙教也。

答張雨若

門下以命世之英。接元凱之運。鴻名興而作雨。賜姓翁以連天。廣昌之廣。洋洋清江之清。湛湛所在快觀。實願從遊。已寄謝於右文。復附聲於興祖。舉美人而誰爲語。思公子而未敢言。忽以令君之言。欲爲相公之祝。聊以咲小者之爲小。製何如大製。豈容代大匠之作。小年不及大年。惟其有矣。豈曰能之。

寄姜守冲公子

不佞弱冠時。庚午冬。同令先公春試。同旅舍對牕扉而臥。先晨起者。必拊背而咲。時王鄭二君子在焉。以後道義風期。常相切厲。訪之宣城。張青野在焉。壬午生赴春官。過杭州湖上。臥雪者月餘。生之制義。並是此時所作。每一篇出。先公必爲噴飯絕倒。夸其必傳。向後音徽渺焉。古人

不可見矣。懷思至今。山川曠遠。莫知公子幾位。賢孫幾人。明德之後。必有達者。幸悉示我。以慰遙思。先公當已祀於社。諸所爲銘傳。飾終信後之文。一一寄讀。詩書孝友。弘紹先業。自是慶門饒事。益爲勉之。生年六十。兒輩勝衣而已。王鄭張三君家世。何如亦一時共旅之懷也。悠悠江楚。睠言莫盡。

與康日穎

讀大作。瓏瓏瑩瑩。鮮發可喜。加以瓏瑒。魁卷無疑。蘇有嫗賣水磨扇者。磨一月。直可兩半月者。八百錢。工力貴賤可知。吾鄉文字。近不能與天下爭價者。一兩日水磨耳。

答張了心

君子之至於斯也。吾未嘗不得見。况如了心者。

有江漢大國之風。又吾亡友子聲之友乎。得子聲之友如吾子聲在也。悲喜殊甚。扇頭見故人尚能楚歌也。盱有明德夫子語錄當已醉心無寶山相失也。

與門人吳來復

蘇季子黃金盡。益發篋引錐。卒以六國擯秦。管子之後一人而已。門下固爲清吏後。而文史足用。止時義一路。未肯降心以從。此如轉丸振落。能以鄙言從事。時亦弋獲否。

答來任卿觀察

今春計吏見去者。直以爲仁兄卽主。寃哉。雖然。莒僕窮弱人耳。行父逐之。張其事者。猶曰舜功二十之一。仁兄功不舜功二十之半乎。花圃接樹何似。春早便有佳意。時時行散及之。倘安車

且至。又須車上一儻何如。

與余成輔

先儒云。收放心。即可記書。不怠。足下靜坐存想。數月來。讀書。覺有光景。不似違日。此如苦行頭陀。忽然開霽。瀾香千偈。不足爲也。今之隱几者。豈昔之隱几者耶。

答遂昌辜友吾

門下揚粵。璇原晉安華族。清明在躬。挹清源而寫照。宣慈惠物。挾溫嶺以揚暉。赤子何知。庇棠陰於父母之國。小人革面。食棗椹於君子之堂。奚豺虎之足投。顧鳳鸞而已化。政高東浙。風遠南洲。至如不佞。傷昔年之製錦。敢言大邑大官。仰今日之鳴琴。足辨任人任力。旣荷包蒙。更慙惠賁。謹頓首以謝來儀。尚剖心而談遑事。

平昌有君

子堂

與王觀生

世人如。鰲山燈。裁有煖氣。手足便動。吾弟可不
一發憤耶。三兒已赴龍沙矣。

與朱象峰

昨譚江陵以下諸相。各成局段。兄憶其大畧。記
之。稍暇當爲點定。可論相。亦可論世也。口占志
感。并似。總教拋却宦情。何忽自悲傷。忽咲歌。
百年來。遷客。禋數家。開閣。不。曾。過。

與羅玄父

夢澤書來。始知臯比南學。以弘材而蚤攝清序。
士固有所自致。如薄俗何。生長西湖。宦學南都。
勝寄都爲妙明收盡。著作日新。可勝想似。

答樂愚上人

此時世路人情。大非昔比。做官人失勢。出遊亦
難如意。况衰颯老僧。數百里外。向朱門求覲。能
悲施者幾何人。安之矣。兩貴人俱無報書。亦無
庸相報也。蓮社文久附去。遠公有靈。世豈無具
龍象大力者。成此勝事。不必隱向鷄鶩索食也。
附續棲賢蓮社求友文
歲之與我甲寅者再矣。吾猶在此。爲情作使。

劬於伎劇。爲情轉易信。於疾瘥時。自悲憫而
力不能去。嗟夫。想明斯聰情。幽斯鈍情。多想
少。流入非類。吾行於世。其於情也不爲不多。
矣。其於想也。則不可謂少矣。隨順而入。將何
及乎。應須絕想。人間澄情。覺路自非西方。蓮
社莫吾與歸矣。昔遠公之契。劉遺民等十八
賢爲上首。而康樂高才。求與不許。淵明嗜酒。

而更邀上名跡。旣遷勝事。遂遠至趙宋省常。昭慶之社。虛有向王二相國名。隱跡不著。亦足致慨於出世之難矣。吾弱冠徘徊墜簪池上。因而自念。異日投簪度其在此。四紀而餘。因循未果。邇欲奮飛。開蓮續社。而故林馳傳。頗礙棲遲。諸所高深。去人大遠。津梁一處。允惟厥中。則有唐少室山人李公所隱。棲賢故

基。谷林石淙。雷動車震。橋名三峽。循涯眺聽。空寒應心。五老雙流。傾其左側。龍淵鹿洞。躐其近間。真不盡之靈墟。而無爲之盡境也。中有平疇。煖曲茶笋。斯儲谷口。江乘。延接非遠。興言葺築。無負初懷。冬春間。復聞九江分司。錢塘葛公。加意道業。亟進依之。異成斯事。比度章門。葛公幅巾歸越。而棲賢老釋樂愚實

來樂愚故有淨行可語者。旋告之故。樂愚曰。亦其時也。高天銷於熾炭。大地沉於積流。况此聚沫之軀。懸輿之畧乎。雖然。非有同心。安能久處。曷若遂蹤林遠。大啟宗雷。庶使鸞鶴相依。蘭菊無絕耳。吾愧其言。自惟素尚。淺於淵明。襟心廣於康樂。而敢擅嗣盟。以滓前哲。已而靜思。有足述者。晉宋之間。世道奇側。遠

公夷迹。諦交實深。玄慮我明。一家恢然。道廣才度之士。朝壑交容。慕類以悲。感愾而集。要亦語嘿之通。懷遙來之大致矣。且吾有二友。湯嘉賓久。愾嘆於棲賢。岳潛初近。勤施於昭慶。茲之續斯盟也。成斯役也。二公首其許我乎。嗟夫。匡蠡之名迹。鉅矣。宇宙之名流。盛矣。遺民通隱。必有周劉。散騎舍人。未乏詮炳。費

神明於匪妙。委日用於無常。情有所必窮。想有所必至。苟懷千秋之寄者。皆將有感於斯言耳。

寄盧貞常

不佞被病寒崖。門生陳伯達來云。門下已返莆中之棹矣。駭愕沮懊。不知所以。後言其槩。始有山來世路之難行。宦情之難信。一至於此。門下弘猷亮節。炳如日星。何能點綴。獨爲世道人心一恠。惻耳。當事憐才。自應風駕。以慰懸歧。

寄門人傅雲中

大作知當大受病。中聞報爲撫掌大咲。知雲中亦笑而不止也。逞勸門下調攝快意之際。宜倍自珍。

寄葉增城

方布穀寒疇。而傳春錄者云。門下高發矣。蒼蒼者。何嘗不念讀書人耶。錄中名士不少。而能流雅頌之聲。蓄治安之術。正恐未有賢於門下者。承明著作。幸有早寄。

答江完素

金川深仁。戶讚途頌。去思可勝耿耿。封彈之司。在帝左右。明公可謂能安人。當事可謂能知人矣。兒輩碌碌。承念及并謝。

答岳石帆

讀手筆云。世入亂萌。何言之徐徐也。喜外間把持。差勝吾輩。或可恃以老。不至大顛越耳。

答李鵬岳

暑曠中得讀扇頭。四十年塵漬。豁然頓消。更辱雙素。清人之惠。可易得耶。海濱高枕。久負蒼生。

如何。

答余瑤圃

不佞自爲童子。求蒙而叨執憲之知。暨作祠郎。進旅而托司空之重。仁深引汲。義切歸依。顧以竄迹於炎方。遂乃銷聲於寒谷。音徽儼爾。慶赴闕如。每咏大車動羔裘豹袂之想。欲陳采藻寫桃投李報之思。力請未能。公論具在。加以通家

之喜。得觀華國之成。妙宰殊高於一丘。集賢將徵於四諫。拜太丘於都下。久知元方之有季方。重蒼生於會稽。快覩萬石之齊安石。方懷宿好。更重新知。海上相望。明月祇用思存。山中惟有白雲。無堪持獻。

答李淮南

門下蟠根僊李。擢秀維楊。本當盛之白玉之堂。

偶爾試之清風之邑。才華無敵。一洗而凡馬盡空。政事有神。四顧而全牛已解。至如不佞一行。自免原非養望。東山再出。何期不致貽譏。南岳分無求於聞達。寧言空谷足音。奉有斐之文章。真是從天喜色。多儀藉璧。拜嘉惠於書詩。筆墨之中。薄意未將。祈炤亮於竿牘。篚筐之外。

答錢受之太史

文章之道。有盡所托。曠世可以研心。異壤猶平交臂。存來感達。咸效於斯。或爲風神形似之言。或以情理氣質爲體。愜一而止。得全寔難。捧讀大制。弘郁之文。深微之旨。豐美者。如群鳳萃萋。而朝陽溢其采。簡妙者。如高鴻嘖噪。而靈露發其音。渴者飲其情。瀾倦者驚其神。岳翰天飛。而不窮。卮日出以無盡。粲矣備矣。而復垂音一介。

獎借橫披。所謂溝中之斷。寵以丹青。混沌之姿。鮮其眉目。通懷若斯。心感何極。不佞壯莫猶人。衰當復甚。世途曠曠。安馳王霸之思。神理編綿。長負師友之愧。賦學羞乎壯夫。曲度奪其下里。諸如零星小作。移時輒用投捐。蓋亦寸心所知。匪煩人定者也。又何足掩空虛而對問。後怡悅以把似者哉。江外三藩。時勤星使。如天西顧。候

望有期。

與葛屺瞻太叅

擬過湓口。庶挹清真之色。而一琴一鶴。宵在逋仙亭際矣。悵情中返。未幾馮公坐化。真所云嘆逝比悠稔。交臂乃奢年。徒令彌深。逞念耳。樂愚禪老以棲賢蓮社見約。偶與題詞。意此地是明公夙慈所留。非得明公發神鷲之音。號如龍之

衆固不能震動。榛礫招延氣味也。萬惟留意。無與俗同。

寄朱朱陵

近得良書。知已還僊署。弟志似閔叔。不肯一累。縣官三年無謬敬者。會稽士馬生應兆。以高才困成均。幸過而與之。

與喻叔虞

見賢昆季。俱瑯琊。如見松高。生在外。最爲吳越諸少所愛。歸來十載。始見叔虞。愛我叔虞。有意成詩乎。學律詩必從古體始。乃成。從律起。終爲山人律詩耳。學古詩必從漢魏來。學唐人古詩。終成山人古詩耳。叔虞力尚可爲。如生老矣。尚能商量此道。恃愛言之。并以示我同好。

答楊景歐大行

某猥薄無所底。門下乃褒其纖介。先車騎而顧之。復喻以無毀導。以有言薄陳梗槩。獲受淵弘。東國之下白屋。西河之過曲巷。未足儷其冲洽也。委頓荒沉。未敢再奉光塵。夢寐天人。邈焉河嶽。承示台懷。中原無黨。三門湍急。底柱誠難。諸惟門下自力。

答沈幼宰

尊公名德中朝。舊於讓亭師座右。習聞風淑。嗣知門下文采。照麗兩都。更愿名翰天隳。奇書日出。貫穿三千年之上。翻駁二百則之中。奇矣麗矣。序言勉成以復。公有良史才。大對維期。便當荷達木天。用尉跂仰。

與余節侯

利器不可以示人。節侯文字。有金石聲。幸益自

愛。

與門人李本仁

吾鄉氣脉方盛。既占羊角。遂擬龍頭。來作亦神。鏤之至矣。勉之。

與胡實美

舟泊文昌而不入我室。能無憾耶。惟孝友于兄弟。少白有子矣。

答顧伯欽

牛女之墟。璇衡奕奕。下於臨汝。斗匡玉茗堂中。何遂有如此客。乃以尊公豐碑見屬。不佞小文。何以辦此。而貪負名德。未能固辭。且煩名公大孝。不遠二千里而來。令人感惻。但哀瘠之餘。頭岑岑然。意憤憤然也。秋清後從事嘉命乎。伏枕荒忽。不盡所云。

與男開遠

祖望孫榮。孫榮而祖不待。兒舉於鄉。父嘆於室矣。柱聯寄爾。寶精神則本業固。謹財用而高志全。我歌鹿鳴五十年。求一避債臺不得。念之。

答羅匡湖

弟朽人也。父母朽則朽矣。如仁丈出爲一世之重處。爲大道之宗。皆大孝事。何復遺憾而不孝。能追孝萬一耶。顏慙眩瘖。無復人形。時問棲梧。土星何時剗度爾。

寄門人饒見石

見石積學敦行。何妨爲六月之息。來使云見石且就選。如以爲色養。則捧檄亦佳事也。

東杜西華

枕上覺氣隱。因思明德師。講勿忘勿助。大有入

處其語錄幸抄示。此亦弟朝聞時也。

東羅敬叔

足下雪中來視。正以高誼示兒輩耳。十二故人傳。又添一箇焉。小詩爲別。閱世常高臥。懷人向獨醒。吾衰難一送。號鴈遶江汀。

答李孟白岳伯

郢些華於袞綸。南金盈於渥鼎。劉綱龐蘊之喻。

昭若昭蘇。第榮養多。虧終難以世外相釋也。

答門人李實夫

邪而有餘。不若正而不足。爲子之節已終。何必求餘也。

答馬釋遙

先慈之哀。繼之先嚴。創鉅痛深。加以衰羸。溢粥強杖。不能起此壞墻。何暇及硯席間事。第痛定

時作千里之思。大篇高者危激。深者淵裕。更疎豁之。於世目尤快也。

寄朱以功

弟與仁兄周旋道義。隱微不欺者四十年。於茲今病彌留。清光遂窄。三兒或不墮家聲。惟仁兄時而督教之。如弟戛戛一生。寡過未能。蓋棺已近。短歌志媿而已。少小逢先覺。平生與德。

年幾望七。疑是死陳人。

答劉宗魯

擬爲詞哭尊公而六十八歲之兒。忽焉失此怙恃。斑斕頓易。堂室交空。如割之懷。重創莫比。何能復畢。誅挽之禮。遠儀鄭重。愧無以承。涕零而已。

答蘇眉源絕句

先嚴跽伏衡泌中。獨台慈禮異。題之曰。可聞不可見。悲夫。今真不可見矣。辱莫施。傷哉。鄉飲祭酒之時。何時也。篤終之誼。哀感何極。

答門人萬可權

昔人云。未聞以宦學也。然而從學於宦。其學愈滋。山川風物。國憲官常。恣其采括。或不在區區。佔俾間也。桂宮在御。而苦次是存。詞誼兼惻臨。

風泫然

與蔡質凡羈伯

門下公方簡澹。絕無世俗濃華機利之心。可謂大雅君子矣。而一旦仰罹大事。芾憇之樹。愴若苦帷。攀臥之懷。踴於號慕。獨弟以毀瘠沉頓。匍匐莫逮。恃門下內恕。孔悲不深。罪於同憂者耳。

答門人其伯聲

病何足問。旦夕從先人於地下。亦大快也。口占
作答。望七孤哀子。咿咿不如死。含笑侍堂房。班
衰拂蠅蟻。

人專帶懸八廿廿廿

門可公寸。廣部。絲無世。谷豐華。對休之心。何階

與蒸贊八驟前

風必然

湯若士先生絕句選叙

天下人。步。寵辱得喪。宛

生夢。覺之。關。都打不破。

打不破者。識不破也。惟識

不破。故打不破。惟打不破。故

說不破。年來熟讀莊周書。
乃知此老胸中。世情道理。豈
分透徹。道真不遺。步屎溺。
樂真不遺。步觸髅。梁真辛。
困于蝸。楚真嚇。人以鼠。故
五元美。注。莊子。鬼。神。于
文。是真知。莊子者。近有
首事。刻以湯。若士。先生。
絕句。選者。余視其篇中。
如。覓。世。題。夢。嘆。老。喚。病。

伏枵嚼[△]訣[△]苦[△]諺[△]是何其
高[△]閎[△]特[△]遠[△]多[△]仁[△]人[△]長[△]者
之[△]言[△]也[△]盛[△]唐[△]詩[△]人[△]俱[△]稱[△]
李[△]杜[△]歷[△]李[△]獨[△]工[△]情[△]語[△]杜[△]
單[△]妙[△]景[△]詞[△]詞[△]質[△]之[△]以[△]忘

寵[△]辱[△]齊[△]得[△]喪[△]一[△]死[△]生[△]了[△]
夢[△]覺[△]當[△]復[△]滯[△]筆[△]先[△]生[△]
才[△]既[△]殊[△]絕[△]而[△]意[△]收[△]清[△]虛[△]
自[△]平[△]昌[△]赤[△]手[△]歸[△]橐[△]不[△]名[△]
一[△]錢[△]一[△]二[△]鬻[△]高[△]文[△]日[△]為[△]四

方門人室子取酒用餘
金幾何弗問終日枯坐
蒲團上人乃始得以其
心間覓世人之鬧以其
情實礙世人之豔故平
古少傳奇以黃梁南柯
喚人曉世類若此而此
其碎金矣時論稱先生
制義傳奇詩賦
昭代三異曷異爾他人

擬為先生自為也。擬為者
學唐學宋。究竟得唐
宋而已。自為者。性靈發
皇。機滅沒。一會此學。
又自自得。其為先生自

得其為先生。此先生之
以過人。而之。人。厭王木子
者。思袁徐。厭袁徐。思
先生。故先生絕句。何以刻
也。金少未以姑。安此。以慰

三三三之恩了

系曆丁巳夏抄後學子丘

兆麟題于徐州之途

次



叙臨川湯先生玉茗堂絕句

叙臨川湯先生玉茗堂絕句

蕲馮子曰詩六經之微言也。騷人好

譚詩笑。譚詩好譚微笑。好譚微

而微絕。六復更為不好譚微笑。譚

其所不好譚微。而微更絕。微言不

續情性清訥。而天地萬物之心。閉
彼支藉口雅言。而流連於鳥獸
草木之騷屑者。此政不可與。臨
川之詩者也。余汗漫人也。而妄
謂臨川之英氣言詩。臨川亦嘗嘲

余拙。而古臨川之流者。余也。余初
知臨川於雪。龍之放鶴亭。續
雍藻。去臨川時。見其流矣。而
心似江水。長澗

孝陵雪。臨川由奉常遷司

初部。謁

孝。陵。昭。也。不。姑。趨。之。拜。福。仰。自。展。

木。冠。昭。川。由。初。部。左。遷。山。嶺。南。江。上。

昭。也。比。似。陶。家。栽。五。柳。使。之。在。

槐。棘。也。春。風。昭。川。由。平。昌。中。考。

功。生。辛。丑。吟。也。此。昭。川。

夫。國。行。役。之。微。也。瘵。絕。不。作。白。岳。

之。夢。笑。孔。不。入。黃。麻。之。閣。堂。昭。

川。傲。也。稻。梁。而。作。江。海。之。心。柳。柳。

而。恣。河。岳。之。態。豈。惟。川。信。也。歡。懽。

縱貫去而夷猶。以男米筆妙處
而拋却。豈臨川韻也。此臨川情
性。非采之深也。采之知臨川也。將
可哭臨川。言似臨川也。臨川之知余也。
又何似起臨川。而似余也。臨川涉

世之似。然者。可解。不可解。之心。余
之似。臨川。然者。能言。不可言。之口。
又何怪。趙孟之徒。必欲抹殺乎。
昌。辛丑。一段公案。又臨川不可解。
獎余不可言。之激。託之以爾家。以自

軋也。臨川諸子。大能讀臨川書。而益
光。其道。父子孝。產且努力。乃崇事
明德。開歸仁之院。闡大之。而
孩。微言。立江右之宗。廣臨川之
學。臨川所。以。會。喚。付。出。之。房。班。

袁村。鏤。塲。余。也。臨。川。之。後。
遺。憾。於。

夫。教。之。交。矣。

攜。李。軍。第。岳。之。聲。之。書。於。潛。
初。書。院。



臨川湯若士先生玉茗堂絕句選

岳潛初

臨川湯若士先生玉茗堂絕句選

臨川湯若士先生玉茗堂絕句選

岳潛初先生點正

男 開遠錄次

門人朱廷誨校

閱世

偶向街衢立。長風吹我襟。不知來往客。終日是。何心。

題夢亭

玉茗堂絕句

一卷

一

知。向。夢。中。來。好。向。夢。中。去。來。去。夢。亭。中。知。醒。在。何。處。

苦瘡問達觀

四。海。難。消。熱。三。焦。不。暖。涼。自。然。心。似。瘡。何。處。藥。爲。王。

遷祠部恭謁 孝陵

寢。署。三。年。外。祠。郎。初。報。聞。臣。心。似。江。水。長。遠。孝。

陵。雲。

聞 聖躬調御有感

帝。母。親。調。藥。千。官。想。御。門。鍾。陵。無。限。色。今。日。聖。神。孫。

海南畱別貴生書院

先生謫徐聞尉所創

天。地。孰。爲。貴。乾。坤。只。此。生。海。波。終。日。鼓。誰。悉。貴。生。情。

知。向。夢。中。來。好。向。夢。中。去。來。去。夢。亭。中。知。醒。在。何。處。

苦瘧問達觀

四。海。難。消。熱。三。焦。不。暖。涼。自。然。心。似。瘧。何。處。藥。爲。王。

遷祠部恭謁 孝陵

寢。署。三。年。外。祠。郎。初。報。聞。臣。心。似。江。水。長。遠。孝。

陵。雲。

聞 聖躬調御有感

帝。母。親。調。藥。千。官。想。御。門。鍾。陵。無。限。色。今。日。聖。神。孫。

海南畱別貴生書院

先生謫徐聞尉所創

天。地。孰。爲。貴。乾。坤。只。此。生。海。波。終。日。鼓。誰。悉。貴。生。情。

番禺江上長至

不能趨舞蹈。聊自展衣冠。日影隨南至。天心向北看。

過溪口冷水店

忽忽登樓去。長安五度春。如何冷水店。尚有執心人。

觀劉忠愍公手筆口占

危言奉天門。疾雷擊鷗吻。骨肉了無餘。銀鈞見忠愍。

候彭侍御獄所時尚書都堂郎吏次第在
係傷之

未必關三木。曾無授一經。年來看貫索。多是貴人星。

聞庚陽被逮慘然作

獨有豐城劍。千秋氣不銷。長平一杯酒。還合祭
臯陶。

題蓮池墜簪

有序

予庚午秋舉。赴謝總裁叅知餘姚。張公岳晚
過棲賢寺。臨池搔首。墜一蓮簪。題壁而去。庚
寅。達觀師過予南郎舍中。曰。吾望子久矣。因
誦前詩三十年事也。師爲作館壁。君記甚奇。

今春五臺僧樂愚來乞文。復棲賢寺。脩墜簪
之約。予病苦。恐未能觀厥成。感激悲涕。是用
存其少作。奉爲來因云爾。

搔首向東林。遺簪躍復沉。雖爲頭上物。終是水
雲心。

葉東。橋影下西夕。遺簪秋水中。或是投簪處。因緣蓮

野意

野照紆寒碧。林煙上夕陰。終朝采瑤草。不是楚人心。

新汲

銅瓶受五升。青絲三合繩。蕩入甌。扁裏蓮花發。古青。

咏古

信陵君飲酒近婦人

魏國乃爲累。萬古悲公子。世上無神僊。英雄如是死。

荆卿所待客不至

所待要爲誰。造次入重關。壯士有寒聲。心知不復還。

司馬德操謂龐德公妻子作黍元直欲來

世亂難爲士。存身各有致。鹿門一輩人。未測語何事。

王逸少覺傷哀樂之致

才盡氣亦盡。情事復幾許。大勢老人懷。難與少年語。

題降龍羅漢

鉢小龍亦小。龍大鉢卽大。若作小因緣。終成陰

器界

書租曆後

欲斂東臯稅。須清南畝苗。獨笑陶彭澤。持籌寫簿時。

佃客題名滿。倉塵漬墨深。了無江海意。真有稻梁心。

擇日裝新曆。逢年慶濁醪。老蒼教落墨。庄客對

揮毫。

報國將爲報。傳家此足傳。今朝外史氏。宜書大有年。

別門人李孺德

我自悼吾親。因君倍愴神。十年師弟子。千古吉州人。

鬻百壽圖

一壽二曰富。常疑斯言否。末路始知難。速貧寧速朽。

劉晉卿年姪來問疾

文情不厭新。交情不厭陳。能存先昔友。畱示後來人。

病中喚主人翁

尋常作使汝。不容宅中立。今日喜翁歸。作使亦

何益。

聞友人。有以卜兆香城訟者。

卜兆已下策。訟言無遠情。寸心埋不朽。何必在香城。

摘白

側室了無與。聊取世眼黑。今朝好日辰。鑷此一莖白。

羅浮夜語憶明德師

此詩久已遺藁先生於病中檢出

夜樂風傳響。扶桑日倒流。無人憶清淺。夫子在

南洲。

伏枕答鄒爾瞻朱以功

少小逢先覺。平生與德隣。行年踰六六。疑是死陳人。

銀俵

友人云世有虎俵有銀俵吾宗家閩邵峪中有得窖銀歸忽穢甚不可柰

有故老云是賊窖金時常苦一人至
求死不得曰爲我守窖其人應許畢
之窖中遇金者祭度後可
朱氏如教已而穢淨用富
死。讐。爲。讐。守。俵。爾。何。其。愚。試。語。穴。金。人。此。術。定。
何。如。

有友人憐予乏勸爲黃山白岳之遊

欲識金銀氣多從黃白遊。一生痴絕處無夢到。
徽州。

示數息僧

嘿然成宴坐。一日下三千。和風定何處。空悲長
壽天。

訣世語

有序

僕老矣幸畢二尊人大事。苦塊中發疾彌留。
已不可起。慎終之容。仍用麻衣冠草屨。以襲
厝二尊人之側。庶便晨昏恒見。達人返虛俗。

禮繁室。怪之恨之。恐遂溘焉。先茲乞免。遂成短絕。用寄哀鳴。

一祈免哭

生平畏聞哭聲。兒女孝敬。自有至性。不可強也。慎無倩哭成禮。

善哭已無取。佞哀非所懷。帷宮都過密。偏覺有餘哀。

一祈免僧度

僧舊在門下者。無煩俗七。兒輩持半偈齋僧。念心經數週足矣。

便作普度事。都無清淨僧。灑水奉心經。聊爲破暗燈。

一祈免牲

肉食而鄙。六十七年於斯矣。殺業有徵。報何

所底每見牲奠腥污塗藉大非清虛所宜乞
哀嫻遊幸免牲命止求蔬水見遺非徒省穢
存潔亦大爲鄙人資冥福也更煩屠宰到門
不預乞免者子爲不孝

豕首高刺天羊子隨墮地何當魂魄前作此不
淨事

一祈免冥錢

奠者楮幣相見無煩金銀山錠等物

生不名一錢自分作窮鬼峩峩金銀山不如一
端綺

一祈免奠章

人生而僞聞譽則悅旣反而真聞諛則赧往
見奠章誇揚爛熳長跪高誦兩爲失體竊不
自揣代中表門生預爲數語無煩登軸第書

素紙奠畢焚之。殊覺雅便。萬乞俯從。

維某年某月日某某祝曰。惟靈歸虛返真。

顧在

知

遊良深悲悼。茲陳素筵。附於蘭菊。

用妥靈心。嗚呼上饗。

不煩奠者苦我代作斯文。昨日已陳迹。今日復何云。

一祈免崖木

化者須材。沙木堅厚爲度。崖不足眩也。至囑至囑。

千禩同一土。隨宜集沙板。闊崖無厚質。虛花誑人眼。

一祈免久露

地形取遠。所忌無久畱。

世故不可測。隨在便安置。借問地上人。安知地

中事。

忽忽吟

此苦次絕筆在丙辰夏杪望日

望七孤哀子。煢煢不如死。含笑侍堂房。班衰拂
螻蟻。

附病中示兒開遠三首

方圓吟

生物鮮非圓。制物多從方。卽此先後天。方圓各

有。當悟者妙。萬物滯者差。尋常。

志智咏

有志方有智。有智方有志。情士鮮明體。昏人無
出意。兼茲庶其立。缺之安所詣。珍重少年人。努
力天下事。

粒粒歌

米粒粒。我所入。不愛惜之真可泣。書篇篇。我所

頭年卽是次年因說與諸公不信人未是沙堤
行不穩沙堤無樹可藏春

吊西寧帥

峽石千兵死戰場將軍不敢治金瘡籌邊自有
和戎使閣道無勞問破羌

看字雞子

黃白光中一氣先都無半月羽毛全亦知天地
如雞子盤古於中萬八千

甲辰見遞北驛寺詩多爲故劉侍御臺發
憤者附題其後

江陵罷事劉郎出冠蓋悲傷竝一時爲問遼陽
嚴譴日幾人曾作送行詩

江中見月懷可上人

無情無盡恰情多情到無多得盡麼解到多情

情盡處。月中無樹影。無波。

讀中郎錦帆集

世。事。玲。瓏。說。不。周。慧。心。人。遠。碧。湘。流。且。將。舌。上
青。蓮。子。摘。與。公。安。表。六。休。

除夕遣囚

除。夜。星。灰。氣。燭。天。醅。酥。消。恨。獄。神。前。須。歸。拜。朔。
遲。三。日。溘。見。陽。春。又。一。年。

河橋縱囚觀燈

皆先生令平昌時事

遶。縣。笙。歌。一。省。囚。寂。無。燈。火。照。園。扃。中。宵。撤。斷。
天。河。鎖。貫。索。從。教。漏。幾。星。

題平昌君子堂

君。子。堂。前。煙。樹。齊。山。炊。水。碓。盡。橋。西。庭。中。有。訟。
多。蕉。鹿。市。上。無。喧。少。鬪。雞。

偶誦

花竹臨池散曉光。偶拈諸品坐繩牀。長年得見波斯水。靜日能生般若香。

題鸚鵡賦後

隴西千里向平原。西笑時時綠雨翻。不似禰生終見殺。祇因能作世人言。

聞滇貴道阻訊胡中丞

金沙原與蜀通津。路出黔陽千里塵。何事不教

通一綫。蘭滄千古爲他人。

有感

兵風鶴盡華亭夜。彩筆鸚消漢水春。天道到來那可說。無名人殺有名人。

題寶應寺故址

內史繙經魯國書。寶雲初地出浮圖。不知世上相輪火。燒過茶門一字無。

章門有問若老送達老悲涕者

達公去處何時去若老歸時何處歸等是江西
西上路總無情淚濕天衣。

戊戌上巳於揚州鈔關別平昌吏民

富貴年華逝不還吏民何用泣江關清朝緋綬
看行李稚子牽舟雲水間。

南州門人雪中來問業贈之

斷臂應無世上情。少林人自雪中行。文章薄技
何須此。亦有前程一死生。

題暮江圖

風起煙霏林翠開。暮帆秋色半江迴。疎燈獨照
歸鴻急。長似瀟湘夜雨來。

撥悶偶懷江陵以下諸相

總教拋却宦情何。忽自悲傷忽笑歌。半百年來

遷客裏數家開閣不曾過

病齒笑答

徵角清吟。齧不辭。恐緣微細得參差。不如換與
卿含笑。解唱江南啄木兒。

人遺湘紋笛材。內子持作筆。問之

折雨裁雲。風露清。斷腸千點寄江城。便饒寫盡
湘臯色。何似還他雲漢聲。

代答

解作參差凌紫霞。湘靈終是怨懷沙。不如剽取
摘殘錦。夢裏同看五色花。

代文昌橋閣大士問郡人何以不助大士
完橋而遠助南昌旌陽廟祝

龍沙一火自應傳。魚腹千人更可憐。可是不從
橋上過。都求拔宅竟昇天。

代都人答

大士行緣敢告勞。微情功德兩爭高。蛟龍柱燬施織鐵。烏鵲橋成更一毛。

偶興以三百文度一少年爲僧

三百文錢不可憐。一頭頭髮向諸天。徒然不得金刀力。擢髮難消此業錢。

自心煩惱却求人。選佛場中作勝因。便與汝頭

三百箇。只教還我髻中珍。

水月師破船吟

明月西流江水東。破篷無恙好節風。衝波不信船心漏。到岸纔知杯渡空。

嘆卓老

自是精靈愛出家。鉢頭何必向京華。知教笑舞臨刀杖。爛醉諸天雨雜花。

和張相國咏玉蘭

長郎客散雨微晴。素影高寒月下形。似是相公
憐。曲廡木蘭花。嫚一聲聲。

法堂僧說泥丸事

西笑無因躡紫霞。時時相勸服靈砂。深秋不上
終南去。已過蟠桃十月花。

洞主空留火候。畱傳來太乙。近天都。不知一線。

風。提起救得蓮花七佛無。

辛丑大計聞之啞然

時先生以戊戌春掛
冠例不當入辛丑計

孫劉要使不三公。點滓微雲混大空。比似陶家
栽五柳。便無槐棘也春風。

平昌齊發弟子從師吳越里。居有來問者

送子吳西去讀書。一時桃李似春初。今朝得見
柴桑叟。落日寒園自荷鋤。

贈蘇醫田家

仕宦逢年總未央。仙翁車騎有餘糧。城南二項
都休問。六印何如肘後方。

重過采石

夕陽千里弄舟還。一片秋聲兩岸山。醉着錦袍
如夢杳。月明何限水雲間。

睡起

門戶從知氣色微。花前濃睡過春暉。莊生大有
人間世。忍遣清魂化蝶飛。

麒麟畫墻爲風雨所晦

吳墻初立彩雲新。風雨從天洗角鱗。門戶十年
班剝盡。不妨人笑懶麒麟。

繭翁口號

有友人云我輩投老如住繭中
先生喜其言俊因以自號

不隨器界不成窠。不斷因緣不弄蛾。大向此中

乾○到○死○世○人○休○擬○似○蘇○何○

去平昌十年餘士民忽遣畫師徐侶雲來
寫予像以祠遣之

好手高情徐侶雲大兒能似李將軍神明妙處
今何有却遣丹青混使君

雪殘寒日映江干畫到歸鴻目送難恰憶清華
舊山水五絃容易不曾彈

邑有清華閣

地闢江樓有雁聞長林歸夢雪紛紛心知遠意
宜丘壑縣社何由畫陸雲

偶爾朝臺竟不還吏民相問好容顏都應畫與
江湖意闊落雙鳧雲影間

遣蜂

清露高簷歷亂旋午煙微颺網絲纏憑誰決取
飛飛去作蜜啣花謝少年

咏陶

抱琴歸去飲微醺。山海箇中眼一過。自是秦人
貪避世。泉明何必恨荆軻。

偶齋答客

蓮社珠燈一佛開。意中空色與徘徊。分桃擲果
都無分。何賴今朝識悔來。

癸丑冬耆兒不戒書畫燬盡失去褚蘭亭

爲缺然思萬乘之力。有不能存所寶亦復
了無恨耳。

古瘦今肥。自不倫。水衣風帶。共成塵。拚教換與
梨花折。未必吾家有世臣。

過耆兒故墟有嘆

焚巢逋鳥恣飛沉。偶爲孫孱一動心。石地斲田
全望雨。老人栽樹不求陰。

漫書答唐觀察

嶺外梅殘鬢欲星。孤琴搖拽越山青。只言姓字
人間有。那得題名到御屏。

縣。小。河。陽。花。遍。開。金。盤。露。冷。醉。人。來。也。知。不。厭。
山。公。啓。解。事。長。虧。女。秀。才。

蘭。署。江。南。花。月。新。封。書。纔。上。海。生。塵。心。知。故。相。
嗔。還。得。直。是。當。今。丞。相。嗔。

一。疏。春。浮。瘴。海。涯。五。年。山。縣。寄。蓮。花。已。拚。姓。字。
無。人。識。檢。點。封。章。得。內。家。

寄謝餉部遼左

插。漢。窺。關。事。欲。多。遼。陽。當。已。失。紅。羅。寧。前。直。鈔。
開。原。路。止。隔。三。岔。一。渡。河。

中。郎。萬。里。計。軍。儲。海。餉。登。萊。似。國。初。若。道。全。遼。
堪。郡。縣。只。消。家。令。幾。行。書。

送日者謁溫中丞純

交初紫氣欲如何。擊殺刑衝世局多。要得郎星
依帝座。莫教箕口向天河。

聞湯司成去官

鹿裘初染敬亭霜。江海相思雲氣長。不借風流
爲祭酒。荀卿垂晚立康莊。

中元題

窮鬼錢神不耐真。燄籠飛作紙磷磷。陰司總被
人間賺。忘却司存鼓鑄人。

爲阿佞多病檢方

嶺外時畱蘇合香。鑪頭湯沸小兒郎。不知顛顛
經中說黃帝。曾無立小方。

書金史後

滄桑長共此山河。却爲中原涕淚多。看到幽蘭

軒裏事依然。流恨似宣和。

寒食過薛

東來塵氣雨初分。店樹新煙河岳雲。過盡三廚無一客。今朝寒食孟嘗君。

咏銅雀伎

吳起張巡總爲名。到頭纔識此中輕。若言銅雀分香假泣向。虞兮亦世情。

梳洗作

白髮新梳對曉霞。合歡紗帽鬢裁斜。堪拋繡篋宜男粉。還藉香簪瘦客花。

潔上人重脩棲賢

五老峯前舊跡開。欲將蓮社寄宗雷。陶家酒熟公先至。且作攢眉一笑回。

雙輪走馬燈

一篝燈影亂輪蹄。一片東征一片西。好似咸陽烽火夕。楚騅歸去漢龍嘶。

遺張仙畫乃作灌口像

青城梓浪不同時。水次郎君是別姿。萬里橋西左丞相。何知却是李冰兒。

贖句

張率新詩題沈約。慶虬清思托相如。刳心置地。

何難識古月。今人看卽殊。

暮春別黃右文

清和十日竟青陽。人爲春歸送底忙。江半石尤山寺曉。可無殘夢到西堂。

七夕

露冷風殘月影微。今夜南枝鵲不飛。橫向人間窺贈枕。間從天外看支機。

夢回

海天星月動沉沉。玉女雙窺碧落深。跂答一聲金磴曉。醒時心換醉時心。

秣陵寄徐天池涓

百漁味罷首重回。小景西征次第開。更乞天池半坳水。將公無死復能來。

送張雲林過毘陵

自分濕灰何處燃。偏多幾歲問胡顛。知君得相堅肥客。還傷愚公瘦影憐。

鄒愚公有瘦影榭

見改竄牡丹詞者失笑

醉漢瓊筵風味殊。通仙鐵笛海雲孤。總饒割就時人景。却媿王維舊雪皤。

浮梅檻爲黃貞父作

靈隱山前風自飄。不須剝木取泉遙。猶憐入夜

蕭蕭雨長在西冷第幾橋。

分冰

銀牀曉汲向紗窗。小飭過時熱未降。自笑剪冰無尺樣。縱拋朱李石蘭缸。

玉茗堂校定冊府元龜藏本偶觸浩嘆

已拚冊府隨塵篋。自分元龜食蠹魚。獨憶童烏分校日。玄亭荒草十年餘。

偶成

少小詞場得浪名。白頭文字總忘情。若非河嶽驅排盡。定是煙花撥換成。

苦衲遣客

縷血能消四大身。深深息息也傷神。門前春色休相訪。獨柳池邊一廢人。

病中答繆仲淳

不成何病瘦騰騰。月費巾箱藥幾楞。會是一時
無上手。古方新病不相能。

與陳元石

班荆長笑楚多才。獨自譚兵海上來。慙愧一編
黃石訣。清時頭白不曾開。

與李太虛

少年豪氣幾時成。斷酒辭家向此行。夜半

春雪裏。小窗燈火讀書聲。

別謝耳伯

深尊明燭意何窮。漸喜南行背朔風。吳粵去來
將萬里。人情多在絕交中。

寄華山道士

往歲彭城欲降麻。仙官八百走龍沙。今秋又拜
延陵相。天下紛紛來謁華。

送別劉大甫

欲別悲歌雞又鳴。白頭無計與劉生。恩讐未盡心難死。獨向田橫島上行。

東鄒梅宇口號

余裁足食衰疲早。君幸衰遲足食難。獨羨臧官歸老健。一生贏得不求丹。

別劉琪叔

客思蘭亭歸路賒。一尊清遠道人家。離懷竟日逢春盡。獨坐長廊看雨花。

偶成

遠遊名字入樓清。四壁江山看雨晴。賴是年來雙脚穩。俗人行處不曾行。

登高西望

不老峯中半百年。時將歌咲出雲煙。家居不借

金莖露自有聰明第一泉

若士尺牘世不多見此本為顧俠君所藏道先丁未得之
吳門經鋤堂書肆用制錢三百文書以誌喜 陳元祿記



